

泉州府志

第二十二册

卷之四十四至

卷之四十五

K295.7

2

泉

州

府

志

卷之四



泉州府志卷之四十四

人物列傳

明列傳九

李廷機

王道顯

李獻可

李光縉

洪澄源

黃汝良

楊道賓

何喬遠

劉宏寶

林欲廈

蔡守愚

沈大易

李廷機字爾張號九我晉江人貢入太學隆慶庚午順天鄉試解元萬歷癸未會試第一以及第第二人授編修陞侍讀改右中允累遷洗馬兼修撰侍光宗東宮再遷左庶子直講經筵尋改祭酒歷少詹事南吏部右侍郎署部事兼署戶工二部事改禮部右侍郎轉左兼侍讀學士陞禮部尚書兼東閣大學士在事九月被人言乞致仕不許久之乃許加太子太保予銀幣馳傳遣官護行居五年卒是爲萬歷丙辰帝命卹錄有加廷機沈靜斂飭疆立有守其爲舉人時讀書山中再上公車張居

正延教子不赴入吳中授經於申時行二年教授糊口  
不肯向有司干謁既取高第束身如諸生使封趙藩還  
授書小內侍己丑分校禮闈陶望齡出其門甲子典試  
應天取士得人乙未復典武試當官勤事無一日不朝  
叅不敢效世套請告養病交游餽餉一切辭卻第以節  
約當治生曰羔羊之詩誦大夫節儉正直夫惟節儉正  
直出焉平生議論動稱古人出處之際自謀於心隨時  
據理行其所是其以宮坊侍皇子講學每四鼓呼長安  
門入寒暑風雨不輟爲祭酒以整齊嚴肅約士曰此高

皇帝之訓今人不守高皇帝訓輒遠引敷教在寬之文夫所謂寬者乃多方勞來輔翼欲其自得之謂豈以縱弛哉其吏部南京典京察無偏私兼攝戶工二部綜理精密奏行軫恤行戶四事商困大蘇節縮奇羨度置無用之資葺外羅城一百三十里孝陵周垣三十里歲歲省水衡萬餘金他如皇城直房公署廟祠牌坊橋梁飯堂一一修治或謂廷機公翰林官顧肯親俗事廷機曰有俗人無俗事人不可俗天下國家事何言俗也在禮部時妖書事起捕治甚嚴時沈鯉沈一貫二相不協會

楚王華奎因禮部右侍郎郭正域發其餽遺書誣揭正域不法數事廷機微爲解沈一貫欲藉妖書傾正域及沈鯉帝謂妖書實出正域手逮訊正域從人乳媪下多官廷訊五日不決帝怒甚有詔責會問官有朋友情深君臣義薄之語多官計無所出正域危甚廷機獨以身保任正域爲之翼護會緹綺緝得曠生光旣引伏復掠治令具同謀主名衆在猶豫閒御史沈裕言於厰璫曰事不決縉紳荼毒矣疏請專罪生光廷機與裕同官涂宗濬俱署名上趣定獄生光亦慨然承伏株連遂絕廷

機精簿書以王府事多吏叢奸不可詰乃定爲簡要法  
有請立奏吏無所容私中官亦無從齟齬諸宗德之爲  
立生祠四區又革貢夷之車價三萬寢高麗之戍卒三  
千飭殿試之規以閑進士定殿試之期以便歲貢躬屋  
以居官施衲以活凍諸多興舉二十三年夏雷震郊壇  
旣率同僚條上修省事宜復言今日闕失莫如礦稅宜  
罷撤不報其冬類上四方災異秦王誼漣由中尉進封  
其長庶子應授本爵夤緣欲封郡王廷機三疏力持王  
遣人居閒固拒之特旨許焉益府服內請封亦力持不



可廷機遇事有執尤廉潔自念一介窮儒巍科華貫當  
思所以砥礪樹立報荅君恩無使死之日有餘粟餘帛  
以累君父帝亦知其清甲辰歲朝覲之期於禁中謂左  
右曰此時京官不忙惟趙世卿李廷機兩人不與外吏  
相接也時內閣止朱賡一人給事中王元翰等慮廷機  
入輔數陰詆之三十五年夏廷推閣臣廷機果與焉給  
事中曹于沐宋一韓御史陳宗契持不可久之卒列上  
帝雅重廷機特命入閣叅機務三辭而後拜命謝恩疏  
言人臣惟知有主苟可自致於主者無不盡有益於主

者無不爲不知有身不知有家不知有交游往來不知  
有毀譽得喪必無一念不可與主知必無一事不可對  
主言自是而外有不可則止之訓焉甫視事而元翰及  
同官胡忻攻之不已帝爲奪俸已而姜士昌宋燾復以  
論廷機被黜羣情益憤廷機力辯求罷又疏陳十宜去  
帝慰諭有加明年四月主事鄭振先論賡十二罪并及  
廷機廷機累疏乞休杜門數月不出言者疑其僞於是  
御史楊師程等給事彭惟成等刑部主事熊應都察院  
照磨郭良翰共二十五人交章力攻而惟成三疏尤力

廷機求去不已帝屢詔勉留且遣鴻臚趣出堅臥不起  
待命踰年乃屏居荒廟人跡都絕廷臣猶有繁言至四  
十年九月疏已百二十餘上乃陛辭出都待命同官葉  
向高言廷機已行不可再挽計首尾五年然後得命臨  
行尚責中璫不邀挽乃厚恩數而歸之廷機雅慕清淨  
畫一之理欲朝列之間遵令甲守職掌省論議以奉法  
循理爲先此時士大夫重氣誼尚建白時時軼越所守  
官而廷機不喜之以此攻之者衆且急卒之清節皦然  
不可得而誣也當輔政時四川巡撫喬璧星銳欲討鎮

雄安堯臣與貴州守臣持議不決廷機力主撤兵其後  
卒無事自言曰予在政府九閱月惟主張四川撤兵全  
活黔蜀生靈省饟運俾安疆臣兄弟不至爲播州之續  
此一事差足報國耳年七十五卒贈少保謚文節特祠  
祀學宮所著有四書臆說春秋講章通鑑性理剛宋賢  
事彙編大明閣史國朝名臣言行錄燕居錄文集二十

八卷

明史叅閱書  
李鹿巢文集

王道顯字當世號瞻明同安人從紫溪蘇濬遊遠於易萬

歷已卯舉人癸未進士任台州司理慮囚多平反署府

篆及天台黃巖太平等邑實心行政不以傳舍視代庖  
奉檄查盤所致常例槩卻之入爲御史卽抗疏劾兵部  
尚書王鶚失邊備請以王遴代所條陳悉中機宜出爲  
青州僉事青故多响馬好劫鬪道顯設法擒治爲之少  
變遷雲南叅議丁內艱歸民尸祝之起浙江兵備肅衛  
伍核才官倭寇聞風遠遁遷湖廣按察使解組杜門著  
書得理學之傳

同安  
縣志

李獻可字堯俞號松江同安人隆慶丁卯舉人萬歷癸未  
進士初授武昌府推官疏滯雪抑讞獄得情上官事有

不決屬之輒刃解臬椽有犯法者臬囑寬之不從故相  
張居正獄起人爭刺死虎獻可曲宥其老母妻孥張姻  
黨會尚書坐受寄贓累萬窮搜株連獻可寬其期使自  
輸事竣闔家匍謝曰非公悉逆首鞭笞矣徵入戶科給  
事中會潞王之國疏請諭制在國無以縱敗禮在途無  
以擾困民太后聞大怒請加譴帝特全之越日譙宮中  
疏自袖墜顧近侍曰此李某疏勿失也南兵部侍郎王  
世貞請先師廟用天子禮樂而哲庶之祀有所訂定獻

可言國學釋奠用八佾十二豆籩郡國仍用侯禮十哲

宜進南宮適兩廡官升范仲淹世貞心服他如請內帑  
以賑飢饉決章奏以防壅蔽仰法紀以全安攘所條陳  
鑿鑿中窾轉禮科右刑科左主試山西時慶得士值京  
考以莊愼輔鑑裁物情翕如陞禮科都給事拜官甫三  
日上皇太子出閣講學疏言冊立之典可稍緩而待來  
年諭教之典不可停而虛今日皇長子今年十一歲去  
古人八歲始學之時已踰其三宜及今春孟特令禮卿  
酌定儀注擇吉施行至於輔導尤宜選孝悌博聞有道  
術者爲之何必委巷伯之倫而祕之房闈之內哉疏入

有旨謫外元輔王家屏力爲申救封還內降至于再三  
帝怒甚削籍罷歸家屏亦遂致相事獻可抵家日以書  
史自娛事繼母先意祈嚮待叔父愛而能敬推有贍無  
撫季弟甚篤悉予先貲構廬居之誘誨款至人不知其  
爲異母也溫謹謙退與人交情摯於文不以所長掩人  
不言人過有善吹揚如不及起家二十年田宅僅中人

產年六十一卒

舊志參閱書同  
安志遜菴全集

李光縉字宗謙號衷一晉江人戶部主事仁之子光縉生

四歲而仁歿稍長寓目成誦舉筆成章十九爲諸生闕



覽博物善古文詞不沾沾舉子業師事蘇濬濬深嘉  
之謂異日必成大儒萬歷乙酉鄉薦第一日研經史及  
朝章民隱以備經濟痛士之爲制藝者竄入二氏顯背  
朱子爲文殼文則以示之的就正者盈門得其緒餘多  
取科第有欲爲地于闡中者正色拒之或勸之仕則曰  
昔人以二千石不逮縫掖擁書萬卷何假南面百城爲  
也歸益潛心大業取四書易傳玩索討論而手筆之其  
理潔淨精微其詞平正通達座師黃懋忠之子開府閩  
中足未嘗至其門尺牘往來論學論政絕不及私郡太

守徵修郡志同事欲立其父傳固辭曰班馬著書談彪  
止附自序淳父載筆景仁畱待後時先人誠令德無以  
小子故使人猜有阿私衆服其卓識卜霞壁山厝父爲  
文勒諸石增東岡祀田以供粢盛父遺田不及二百畝  
與諸弟計口而食食指旣繁籍而割異之讓而受惡一  
畝之宮環堵之室終身不改自營壽藏仙景山環土爲  
太極庭列石四十有九以當大衍之數生平著作甚多  
尤喜序述忠義節烈事其文章悉嘔心而出不輕下一  
語卒年七十五歲前十日爲銘授其子曰文之不用道

之不行不處不去總以成仁學者稱爲衷一先生郡人  
請祀學宮喬直指覈實報命與胡黃門別請加旌異焉  
所著景壁集二十餘卷四書要旨四書指南千百年眼  
易學潛解中庸臆說南華膚解讀史偶見蘇文抄評杜  
詩解若干卷其行誼詳所作獨照醒言中

通志叅李京撰誌道南

源委

洪澄源字子定號鏡潭晉江人叅政富孫萬厯癸酉舉人  
丙戌進士授戶部主事歷郎中擢崇文門稅督通州倉  
監江西漕皆以冰檠自持出爲桂林知府卻齟商關引

例金革府史加椽入貲者又革屠牛肆之納錢者歲不  
下千餘金屬軍興餉乏議者欲更舊解贏入縮出所展  
不貲澄源以一時小利百世受害力爭得免在郡三年  
上官某不無所望以需紙爲名佯爲不悟以所需應始  
大恚已偵其治狀乃愧謝覲行三老爲哀千金佐費笑  
而麾之擢貴州按察副使備兵畢節畢節爲宣慰安疆  
臣所轄部地廣兵強冠帶而羈縻之爾澄源外制以法  
內推心置之疆臣以是畏服播會楊應龍爲變朝廷出

輔臣之命疆臣出兵勦戮中丞郭子章委澄源監疆臣

軍疆臣與應龍實肩齒交內懷歡望艱張皇擲濫源不  
動疆臣知不可恐喝遂進兵大勝播兵於大水田斬首  
萬餘級復燒之於桃溪衛應龍敗亡入海固於是疆臣  
獻計請鑿山開後路以進濘泥險阻墜馬蹴脇踰月至  
其處盡收右槽山坡地應龍授首賜金帛先是征應龍  
時懸賞格許平賊卽以地償安旣賊平地未及償而安  
氏有叛目羅學茂更名安順臣輸安情於總督謂其侵  
播州沙溪渭河之地總督責安議正疆界安執會典通  
志家譜爲據謂沙溪渭河本水西故地且謂許地未償

併削故部以益播忿不受命諸道絡繹親臨安境莫解  
倔僮總督曰非洪某不可星夜馳檄澄源單騎往諭令  
其地屬黔者歸安屬播者歸蜀其屬播地而爲安近地  
要害者輸納糧賦安遂俛首奉命夷婦奢世續世統爭  
襲構兵疆臣陰助世續時澄源已遷部思南撫處銅苗  
制府復委令馳諭安隴無助亂兵立解思南碾水苗歲  
爲梗所在焚掠度不可撫帥兵圍冉坡石豹遂降老澄  
來歸擢貴州按察使踰年轉雲南右布政時值阿克之  
變兵匝會城民一日四五驚澄源佐主者爲墨守計調

食給軍士連晨夕因憊不休遂得疾尋轉左而澄源已卒澄源溫質無機不能陰陽鬪捷官雖至方伯第徘徊邊徼閒至其中誠著於人人強曾阻夷莫不歸命當遷思南時疆臣餽二千金不受已潛以二篋封固之雜置裝閒行數舍乃覺仍叱之去喪還過貴州所至數百人爭舁之又三載兵部李化龍敘川貴功晉秩京卿

閩書  
叅雲

臺藏藁  
景璧集

黃汝良字名起號毅庵喜讀易更號易庵晉江人廉州司馬憲清子也萬歷乙酉鄉薦丙戌會試第二名成進士

授翰林院編修壬辰分校取士得人是年用封趙府藩  
 王簡倨欲於殿外安節汝良以天子無客禮堅持入殿  
 中禮畢遂行贈遺一無所受甲午典試江右所收皆髦  
 俊轉南司業移北時遣中官督礦稅所至暴橫上疏請  
 罷之不報監丞胡汝煥素婪恣疏劾之有監生係巨璫  
 愛姪偃蹇無狀欲按之挾巨璫書至良曰國學四方觀  
 型司業無與中官通書例如法懲責以原函謝之會太  
 白書見地震山崩陝西五山突出疏請痛加修省並責

政府言路幾陷危機庚子陞諭德典試應天矢慎矢公



不避嫌怨解首張以誠乃從落卷中手拔者大宗伯馮  
琢吾謂公此行品望愈峻擢東宮日講官每敷引古今  
隨事披陳東宮喜動顏色三載陞北祭酒甲辰以少詹  
事知貢舉充讀卷官場中諸務悉飭不許催鼓以妨文  
思黎明收卷未完者令集至公堂親爲監視囑其從容  
完卷日昃方出得雋數人榜首楊昆早在焉乙巳陞禮  
部右侍郎教習庶吉士念母年垂暮乞侍養不允丁未  
會試總裁得士多至公輔後璫禍起盡節効忠者不可  
勝紀事竣復乞歸養疏九上不報溫旨慰留而母訃音

至襄事後杜門十七年無意復出光宗卽位屢諭閣臣  
開名欲大拜未閱月而帝崩辛酉大臣科道交薦起南  
禮部侍郎轉北吏部纂修實錄皆堅辭不允天啓初百  
務頽弛四郊多壘條上十策大要在嚴明振飭復祖宗  
立法之意疏出時論咸歸鄒南臯稱爲救時碩畫當事  
者忌之出南禮部尙書乞歸乙丑復起禮部尙書掌詹  
事府總裁實錄力辭不允時璫災已燃迫脅朝紳履任  
稍遲禍且不測乃以丙寅五月入都羣僚懾璫威皆偃  
樓趨承狼揖外不交一語遂蓄睚眦三案之獄持論侃

侃力保善類璫益銜之乃堅請乞骸得馳驛溫旨璫徑  
削去及出都猶遣縱騎踪跡良謂之曰上旣放我去爾  
輩乃欲畱我耶抵家聞逆璫矯旨誅鋤善類作悲哉行  
杜鵑行以志感嗣聞逆奸旣殄復賦太平歌十首以志  
喜遂首陳申大義核信史一疏謂三案中建白諸臣楊  
璉左光斗袁化中高攀龍張愼行等宜加贈卹拔擢要  
典諸書亟宜焚燬奏入如所請加太子太保復加太子  
太傅以原職起用令撫按敦促就道陛見卽陳時務八  
要歸重於卹民懲墨節財練兵皆悉嘉納然所言虛冒

乾沒納賄請託騙官鬻爵及宦寺等語側目者不少名對文華殿又言加派疊征民命不堪等事帝皆領納賜茶而退時磨勘試卷屢奉嚴旨疏引敷教在寬壽考作人之義往復申奏得從宥減臺省吳執御王績燦吳彥芳等俱以言事下獄因於祈雨疏中力言法令煩苛犴狴填滿致干天和詞意切直無所避忌時會推閣臣已在首列竟以此疏中止朝鮮貢使與民貿易厥役需索不遂乃以上聞奉旨搜索違禁貨物汝良引春秋及漢

班超等語謂祖宗懷柔實取斯義推索再三歸語其主

棧節橫生無論擬而走險卽歲貢不供問之不問帝意  
回令善遣歸國而荒服不至矣萬壽節例御殿受賀以  
聖母忌傳免奏請如冬至慶賀禮改次日冬至用次日  
尊天也聖節用次日孝親也仁至義盡於禮始備詔是  
其議崇禎十八年有旨取士先德行教官不得衰庸充  
數特拔一二潛修積學者以示風勵科道不必考選館  
員須先歷推官知縣命廷臣集議疏言德行在平時培  
養若祇憑保薦漢之孝廉賢良魏晉九品中正豈盡得  
人國家既有甲乙科其廣文一席稍畱餘地以待白首

窮經之人未可以衰老槩置三老五更豈必年少科道  
當核官評加咨訪考試實屬具文惟庶常原期博覽古  
今練習經濟推官知縣吏事殷繁何能精心誦讀請仍  
舊章不聽八疏乞休命馳驛歸陛辭猶惓惓勸帝培元  
氣持大體急先務寬小過十五年特撰勅書遣官賚彩  
幣羊酒至家存問蓋異數也汝良歷仕幾五十年職列  
清班凡關宗社大計知無不言諄懇似陸宣公俊偉似  
富鄭公忠君愛國之誠始終勿替歸家不問時事所居  
離郡六十里足跡未嘗至城惟日課子姪讀書年九十

三而卒所著有河干文集詩集山居聯句

野

紀朦搜東宮大學講章樂律志歷朝奏疏諸書子慶星

慶華慶貞

舊通志叅安平志  
并諸名公撰傳

楊道賓字惟彥號荆巖晉江人道會從弟萬歷丙子舉人

丙戌進士第二人授翰林院編修晉司業諭德掌南京

翰林院事司經局洗馬掌局事擢祭酒遷詹事陞禮部

右侍郎掌翰林院事轉禮部左侍郎尚書缺攝篆者久

之充經筵日講記注起居累疏乞歸不許奉命有事齋

宮禮未成以疾掖還遂沒道賓爲國子祭酒時疏請東

宮行齒胄之禮表進三國志五代史論斥閹豎公貨財以古爲鑒詞切而直與諸國子按古射儀行之射圃懸省日之賞以誘勸之以推明高帝建立射圃學宮之意其攝尚書禮部嘗因星變請釋逮繫知縣滿朝薦等又請亟舉朝講大典皆不報南京水災疏陳修省五事曰葆清明平旦之氣以澄聖衷曰名閣部大臣入對以決壅鬱曰復章奏批發之規以尊主權曰慎內批中發之旨以杜羣疑曰去形迹體面之套以振事功帝嘉納之

萬壽聖節道賓錄華封三祝之意准而行之清帝勸情



圖治所以爲受天之壽貺命東宮諸王出而就傅所以爲受天之多男子貺捐爵出祿修廢官補大僚所以爲受天之富貺疏入稱旨賜祿壽金字綾符又以東宮輟講四年上言太子天下本培養宜厚諭教宜勤請亟渙玉音卜期開講且引唐宦官仇士良語爲戒其冬天鼓鳴疏言天之視聽在民今民生顛躓無所赴愬天若代之鳴宜急罷礦使更張闕政以和人心不報蒙卹諸大臣諡典久闕道賓以歷時久恐事跡湮廢毀譽失真請下廷議以三年五年爲期博採公論酌擬奏聞著爲成

規從之朝鮮國王長子有疾請立其少子朝議莫知所  
從道賓請選使者入朝鮮國延問吏民而後許之咸服  
中國得體

每遇進講

盥頰焚香端坐待旦入視部事退休邸舍作春秋通鑑  
講章隨事發明借古爲喻壬辰分試禮部丁酉庚子兩  
主浙江順天鄉試丁未主會試所得皆知名士居家孝

友盡誠與人煦溫引已反躬靡有繫吝至乎義所不可

事所當爲不苟徇巽作箴自警大旨謂貴當可賤富當  
可貧須立定根腳我不必是人不必非須剖破藩籬性  
命爲輕名節爲重須審得權度名位非求可得禍患非  
避可免當勘破機關箴成遂爲絕筆歿年五十八朝士  
大夫多惜之爲請贈諡得贈禮部尚書諡文恪遣使營  
喪護葬葉向高銘其墓稱直道而行侃侃發舒始終鱗  
然身名無替卓乎完行之名臣云著有文恪文集

舊志  
參明

史闕書

何喬遠字穉孝號匪莪晉江人炯仲子也生於安福學舍

先夕母林氏夢城隍鼓吹導逸生而異香滿室稍長奇  
偉不凡父炯置膝曰必亢吾宗五六歲工楷書八歲父  
試以駢語曰乍雨乍晴天未定卽對曰有麟有鳳國將  
興知爲國禎命破題題爲冉有某句不稱賢者而門人  
之父曰誤矣曰聚斂附益烏得賢一生清白已見其槩  
攜筆入學舍仲父指筆命破題應聲曰觀孺子之妙手  
察良工之苦心又知其必以作者名世就塾藏詩几中  
塾師命棄夫卽厭歸獨遵父教博綜經史子集文選唐

詩過目成誦十四五卽工古文詞復銳志舉業父炯摩

其頂曰今詞林惟荆石王公爲聞人兒當拜其門下而  
督學胡公二溪拔喬遠應儒士薦時年十九與兄喬遷  
同登萬歷丙子鄉榜丁丑歸娶與兄喬遷楊文恪陳及  
卿李世禎山人黃克晦結社賦詩有溫陵五子之稱壬  
午赴公車父炯歿於家痛泣幾絕賦攀木篇於巾軸中  
得裏父齒作泣齒文服闋矢志奉母不赴春官母以貧  
故累趣之萬歷丙戌成進士果出荆石王公錫爵手拔  
而母林氏已先於正月卽世聞訃殯地復蘇徒跣奔歸  
襄事竣釋服謁選過蘇贊詩文於王弇州大加引重冬

至京頓城外不受入覲官帕金夏四月選授刑部雲南  
司主事西曹多暇與戴亨融袁君學吳文仲王惟允過  
從論詩爲刻燭吟擢禮部精膳司員外儀制司郎中時  
有三王並封之旨上疏言恭繹祖訓震器不可以久虛  
國本不可以徐定其議始寢考功郎趙南星被斥陳泰  
來賈巖薛敷教顧允成張納陞于孔兼等論救鐫秩喬  
遠極言不宜爲宰執報復倭攻朝鮮急兵部尚書石星  
聞懦爲請封貢而朝鮮使臣金晬泣言李如松沈惟敬

之誤致國人束手受刃者六萬餘人喬遠上言兵部失

策而一再上王荆石書不當徇私人聽封貢其後東事  
數年始解石星斃獄人愈服其膽識甲午鄉試科臣議  
欲典衡喬遠力主京考爲是而宗室入仕之法亦喬遠  
首發之會肅藩王薨其子請襲賄中貴得封喬遠力言  
藩府宜終三年喪拒所請中貴無以難也然挾恨刺骨  
矣鄭世子載堉辭爵議封其子翊錫以成其讓晉藩新  
種新牲當封爲猾胥所抑冒給月餉立覈故牒答吏還  
其封其強精吏事人懼服不能欺浙生王某中順天鄉  
試以冒籍革復中於浙及應天均以坐革之案難之喬

遠曰有才如此豈他籍本籍盡錮之耶爲復之詹貢生  
范時化牒歿於水路遠不能歸取牒赴部訴於喬遠卽  
准入試十五年後范令永春通刺稱門生駭之范縷述  
始知屬有宗室名封之事本尾誤遺喬遠銜名主事洪  
桂渚對讀不及詳坐奏牘不恭例罰俸中覺吹求六改  
旨謫添註廣西布政司經歷吏請委罪於洪此去之洪  
亦作疏願自受亟止之不數日洪改吏部歎曰我誤何  
長官敢就職耶卽告歸喬遠赴粵慷慨夷猶無遷謫意



爲構丙房一區代刻其父清源文獻王梅溪真西山二  
公畱墨於郡邸而竇淮南公來代守益相契每事造廬  
問教毫無所干而爲邑人條利病不少斬開泉雅社諸  
士問業雲集日與縉紳遊士唱酬清適旣而念詞賦末  
技無益身心黽勉不休思紹先聖道脉扁其父炯所居  
之東曰寡過齋念北山先墓在焉爲父手植荔園遂之  
鏡石結土屋數椽名其齋曰自誓刈麥掘番薯爲飯客  
至沽村白與醉時從田父泥飲不厭也每與許敬庵李

見羅徐匡嶽范晞陽洪桂渚諸公論學不分列門戶不  
支離心性惟欲於庸德庸行步步繩尺庶不負終歲讀  
書求友之意報許甸南書大畧謂大學一書盡之誠意  
所謂致知格物謂必明於本末之物窮至其理然後知  
吾一念之微可通天下國家之大而無敢有不誠其意  
以明此德此精一旨也何必泥在一字一句之文且如  
切如磋者道學也一語已盡又不待補亡也其于六經  
多發前人所未發戊申子九轉歿一孫亦殤于婦王承

焉先丁未歲程公薤陽復來觀察訪之山中爲構閣曰  
天聽已酉成喬遠懸孔子像並圖諸名賢朔望拜焉郡  
守姜同節入覲越格疏薦少司農呂天池按粵西括俸  
金爲成祠宇置祀田癸丑門人林欲楫入都謁葉向高  
問穉孝何如人楫曰何師不講道學乃真道學生平得  
力惟自誓寡過不求人知葉文忠歎曰粹然君子也請  
郡守蔡五嶽公修羅一峯書院因痛發先生所以取重  
者只緣叅透無爲不爲無欲不欲一章書與鄭孩如唐  
見梅韋衷芹黃季崧張元中率諸門人集講以恥躬名

社嘗題聯座右曰人心中無私便聖天理內行事最樂  
復於鏡山下買田家數椽爲休山書院扁曰恥躬堂喬  
遠家食幾三十年久無仕進意海內以喬遠與鄒南臯  
馮仲好趙儕鶴並稱四君子屢推汝寧通判欽州知州  
光祿大理少卿皆爲中官奏罷光宗登極八日卽起光  
祿少卿時鄒南臯同起抵京握手曰吾道之碩果也神  
廟遺詔僅起註誤諸臣光廟遺詔所指僅國本諸臣喬  
遠投謁部院請推廣詔書論敘歿者時議熿之七月有

雅剴切南北羣推還朝晉添註太僕少卿時

大清已

取遼陽朝中銳意恢復喬遠疏且嚴守廣寧人以爲汪  
及廣寧再陷始服其先見每念神京單危無人分憂其  
冬謝絕入覲餽遺經臣熊廷弼撫臣王化貞先後逃喬  
遠屬稿與馮從吾重應舉朱一桂許維新等疏請逮治  
以正典刑時傳五少卿疏晉添註左通政山東妖賊數  
萬攻陷城邑疏言赤子無知請乘大捷之後招撫赦宥  
從之時朝士欲聲李可灼紅丸弑逆之罪喬遠引孝宗  
定李孜省穆宗定金倣等罪爲議人謂其識大體科臣

朱童蒙劾鄒元標建首善書院講學疏言書院上梁之

文實出臣手當弁黜再疏不報冬進光祿卿洗手剔齒

宿弊盡銷以積勞成疾乞歸不許仍擢通政使言者謂

因病得陞卽日出都抗疏力辭加戶部右侍郎以歸橐

中不滿一金甲子夏抵里卽便道鏡山其講德考業求

書問宇益屢滿會移建朱子祠爲泉山書院延主教事

魏璫煽焰先時遠害璫屢欲起之以收人望不赴鄭氏

猖獗海上聲言潛兵入城惟鏡山前後十里毋動喬遠

曲曉諭魁奇等俛首就戎索後當事得運密籌鼓芝龍  
芝虎一戰擒魁奇再戰溺鍾斌皆其先事解攜力也懷  
宗卽位臺省交薦以南戶部右侍郎召具疏引年會有  
警不得達因念國家有急卽日就道令園丁護視山  
中松竹曰乃公行卽歸矣過蘇常入周季侯周蓼洲高  
景逸家弔其遺孤至南都上先瀝林壑微忠一疏

請開鎮江之練湖以通運道莊烈帝嘉其老成體國

兼署戶工二部在戶部有覈清冗役以破窟穴考倉期  
 以示振刷疏在工部陳經費致匱之由又言年輸淮庫  
 二十萬金非舊例有旨科按勘查而忌者側目叢起會  
 有諷以衰老卽瀝辭臨行復上開海禁疏謂弭盜安民  
 莫先此舉出南都則橐中又餘一金耳入閩遍謁紫陽  
 蔡西山九峯劉屏山雲莊黃勉齋諸祠墓崇化里有張  
 橫渠子孫爲書祠記舟入將樂謁楊龜山祠遊玉洞探  
 奇而還復會講于泉山書院撰懲忿室欲二解未踰年



工部尚書子祭葬巡撫爲請建特祠於學宮喬遠和平  
樂易與人交洞見肺腑獎掖後進不倦田夫野老接以  
至誠每歲時伏臘招飲盡歡數百杯不亂當典試山西  
還朝時一榜諸生聚餞於郊每人爲酌三巨觥至今傳  
爲佳話在官在家著書不輟刑曹有獄志禮曹有膳志  
在粵有西征集假歸有泉州府志其最著者

一代賢士大夫所論著爲皇明文

徵纂閩書一百五十卷皆有功藝苑足資後來修史考  
訂其自著詩歌古文辭

及

家乘計百數十卷不可殫舉學者稱爲鏡山先生子九  
雲崇禎癸未進士授庶常甲申後歸隱

明史

通志林平庵述

何氏家傳合參

劉宏寶字公可晉江人萬歷乙酉丙戌聯第進士選翰林  
院庶吉士授戶科給事中疏言中貴某恣橫狀不宜寘  
左右抗章忤旨得罪諸臣宜亟敘錄以振士大夫敢言  
之氣進工科都給事中察視水衡錢括故貯不能逾百  
萬而一歲中所出贏十六萬有奇私歎曰是不數歲糜

爭之江以西困陶型三吳困機杼徐淮上下瀕河地困  
懷襄宏寶請陶型無徵奇巧三吳力詘機難卒辦盍少  
舒其期河堤潰亟宜復而瀕河閒墊溺蕩析不得已驅  
之版築盍厚議僱直斂諸罷民佐之至陶型之徵一歲  
中制五六下宏寶五六執奏河所宜疏關言人人殊宏  
寶請責治河大臣折厥衷諸請復故道若請浚七百餘  
里陸地別通漕皆調甚宜一切報罷他所引繩墨持大  
體率類是科臣遷轉一內一外宏寶以遜同官自請外  
補遂出爲浙江叅政分憲台州銘其座右曰視公如家

則不敢苟視民如子則不忍傷視同類如已則無私便  
利心視祿位如寄則無患得失心會有言河水被淮泗  
祖陵者帝切責治河大臣部覆波及議河者坐謫潮陽  
典史竟以謫籍卒于家贈太常少卿宏寶清介仁厚出  
于自然粗糲蔬布終身一日所居不蔽風雨晏如也嘗  
對親朋曰吾有二事頗得家法自登第二十餘年未嘗  
訟一鄉人未嘗設一俳優之戲其端槩範雖夜分盛暑  
必正衣冠與人交毋論少長惻怛懃懇傾吐肺腑望之

清家法所著有尚書說諫垣遺藁及詩集孫鱗長

舊志

林欲厦字從奐號隆南晉江人雲程從姪以隆慶庚午舉人教睢州萬歷丙戌成進士繇戶部郎出知饒州饒介湖多盜得其魁首於萑苻中淮藩有嬖優怙寵觸法欲厦謂優罪不赦然獄不可竟也令殪之而事息擢備兵江西副使遷叅政調河南晉按察使擢廣西左布政使當饒時觀察襄陽鄭繼之介人也其子徒步入廨欲厦方勵官自好治事畢不退食而具炊於堂左繼之饋

之大稱畏友察其政稱其有張忠定之風至是爲太宰  
遂特疏薦舉卽擢巡撫廣西副都御史時三殿大工徵  
材於黔徵價於粵以十萬計念粵西窮黎疏以萬死爲  
粵人請命得減半武靖州地故大藤峽峽平置州官以  
土酋岑鐸岑暴其民世世三繼三絕而田州泗城各垂  
涎其地欲厦言岑先非款附功靡捍藩天殄之矣改州  
爲鎮隸之桂平移潯州通判使鎮之官俸不加增而可  
以拯水火塞瑕釁莫此爲便交夷黎莫二酋其黨與掠

先後擒逆黨以獻乃更疏言款不可恃請留兵餉爲後  
計南寧太平苦交屢矣上下石二州賊衝也請壘之當  
用額兵五百人招募土漢人五百人合千餘往來戍守  
梧督撫開府地也故有土司諸兵更迭戍今歲久安瀾  
乞量移諸兵屯要害左江距省會遠省會主將坐制之  
鞭長不及請冬春移駐南寧如邊防秋海防汛故事多  
得施行礦稅行及粵西先是撫粵者請蠲半欲屢復請  
全蠲之凡撫粵三年遜才振懦破格以勵之久任以熟  
之察吏安民爲西人計不遺力以協剿黔苗有銀幣之

賜秩滿五疏乞老加工部侍郎秩予歸欲厦文章適潤  
尤精書法少矜名行刻苦勵官其和平誠懇邊徼夷酋  
信奉要束焉神宗晚年貂璫四至欲厦謂嫉之則自絕  
無所不至惟戢之以禮而開其向善之路璫大欣服年

七十九卒

通志參閱  
書

蔡守愚字體言號發吾同安浯洲人萬歷乙酉丙戌聯第  
進士授南儀制司主事迎母就養暇與同舍諸名公證  
鄉今古所得益深詩文日進丁內艱歸襄事畢採撫前



厥舊時炭直不早給而惜薪司復從中索例不得以時  
納甚且以不如式駁還大爲商病則爲移內外主者與  
訂約時其出納給直令商自兌不經他手凡日用薪蔬  
例供槩從減省曰毋令有餘以爲市又興二廠社學躬  
往課督時內官四出採礦守愚曰民方上供炭課倘被  
流散誰執其咎且近京師安得有礦將抗疏爭事遂寢  
擢虞衡司員外遷屯田郎中去日諸商環擁車爲柅則  
請畱靴爲記固拒之曰有二社學在令子弟勿廢業吾

棠不翦矣是時方急殿工物力告訕力贊大司空疏借  
內帑以郡國贖輸補償之得報命陞四川副使分巡上  
川土酋肆掠播州尤甚以兵備討平之帝嘉其功改播  
爲遵義晉叅政整飭威茂擢按察司陞右布政皆分道  
川南會六詔不靖中丞喬公薦守愚以原官移節建昌  
建地延袤三千餘里五衛八所碁置于猓猓番棘開蠶  
聚烏散剽掠多年守愚先後巡川南最久時土婦瞿繼  
良與其叔馬應龍爭印仇殺授計遊擊吳文傑直入其

印不可得則疏請更鑄至首惡惟縛獻目把餘不足問  
議乃定楊會陷綦江帝命總督李霖寰公徂征守愚以  
畫策督餉功賜白鏹採木役與在川南則條無木之難  
無錢糧之難并陳諸難易情形甚悉在建則條募夫採  
木出水三難又請司帑先給三分之一而以建昌之杉  
易重慶之楠兩地交便威茂餉米三萬餘藩司給直灌  
縣買運不時積欠無稽爲條包攬搪塞乾銷私兌那新  
補舊諸弊竇立三限掛銷獎戒法分派新繁崇寧郫彭

產米諸邑店戶買米不齊驗糧官督之腳戶運米不到  
監收官督之其久逋者量追米腳價給軍自是威茂無  
滯餉其徙建昌則寄孥雅州單車泣焉忽裸從山谷突  
出衆驚竄守愚端坐不動裸至曰此蔡佛爺也相率禮  
拜去至則宣布恩威申明約束番夷戢服復爲畫善後  
諸策改將增兵俾嚴戍守爲建南計安備殫心力故數  
年閒小犯小勝大犯大勝先後擒斬惡夷七百餘追還  
被擄男婦五百餘確然可紀以積勞成瘠疾報滿乞休

移鎮越雋欲計擒黠酋烏撒以爲功亟馳止之曰是未  
可輕也彼巢據官道而力能號召執之必啓釁旣別去  
而帥決計誅之自是曾孽奮呼諸夷響應道路梗塞踰  
旬守愚聞報失聲曰不聽吾言噬臍何及爲撫諭熟夷  
檄將召兵然後利濟鎮西之間享無事焉其威惠素孚  
也未幾得代致仕而直指彭某竟用流言以考功法中  
之蓋自建南被禍士民日請大征而當事日議鵬剿然  
三尺孤懸兵餉難處惟守愚謂宜繕儲胥討軍實以防  
與撫爲持久計所以安建者在此而得咎亦由此初土

官安世隆爲那固所弑孽婦祿氏糾夷報復藉口夫亡

妻繼求管事而陰欲嗣姪祿祈奸弁奸生有居爲奇貨

者守愚責以大義俾逐祈而立安世業然後許之烏思

藏之貢者不無生事內地臺使題叅部覆議革而各番

求復不已守愚謂貢額國初已定彼賣勅之利孰與貢

賞之所獲厚川省三萬茶引亦惟貢番貿易通行今關

門一閉無論茶法爲阻卽軍需且歲增數萬竟如其言

復之於是諸番願世世奉款而肖守愚像於宏化寺爲

捐金葺復古堂祀孔子而退二氏又刻藝林標準及明倫寶鑑以嘉惠蜀士於是知聖教之尊而勒碑紀焉嘗署藩篆一月籍羨金千餘無所取吏白以例且曰如後來者何笑曰我自冇羨後人自無兩不相妨其廉不近名如此嘗曰吾居蜀十四年不敢受各屬一果一菜不敢取地方一粟一絲不敢任喜怒而出一罪不敢聽囑託而臧否一人不敢傳舍官府不敢秦越軍民蓋實錄也守愚學術行誼一遵程朱爲人樂易質直無妍媸態以故特立寡援至家埽軌讀書絕跡城市扁所居軒

曰寧澹客至尊酒盤殮不爲厚具曰惟澹可久戒諸子  
曰得不得命也非分之有不必過求爲詩有魏唐風味  
文出入經史自足名家具載百一齋稿中年七十卒

閩書

通志系清白堂

稿同安縣志

沈大易字希周晉江人自童州時卽厭薄制舉銳志聖賢  
之學稍長洞識心體大原乃歷鵞湖登朱陸講堂浮彭  
澤匡廬與王龍溪畿鄒東廓守益羅念庵洪先會闡王  
文成宗旨錢緒山德洪薛中離侃稱爲吾黨上乘晚造



倦歌聲琅琅若出金石者有觀學質疑正學傳習諸書

大都以良知為宗而其闡發只務收斂精神立必為聖賢之志令學者有階可循有徵可信方伯楊道會稱其

可以藩籬餘姚會合考亭舊志參閩書

明列傳十

史繼偕

林學會

丁啓濬

李叔元

洪啓睿

蘇茂相

趙世徵

蔡復一

林欲棟

黃國鼎

王畿

張維樞

呂圖南

張廷拱

陳玉輝

莊欽隣

史繼偕字世程號蓮岳晉江人湖廣右布政朝宜子弱冠  
從學洪猷受周易萬歷乙酉領鄉薦壬辰登進士第殿  
試一甲二名授編修越年率吉士高克正等上疏請開  
立東宮出閣講學不報開史局領兵制志用封藩王於  
代領節用饗勞盡遠槩辭不受戊戌充會試同考官奉

詔使粵西蠲軍興諸賦秩滿陞侍讀轉中允丁內艱歸  
買山杜松崎於對望石鼓山下築精舍扁曰怡雲野築  
服闋陞左諭德兼侍讀戊申乞休三上疏俱留中明年  
擢南祭酒旋推南吏部侍郎攝尚書事署戶禮工三部  
力清盤庫盜帑積弊辛亥考察屆期與署都察院丁賓  
稽覈不少貸於是給事中段然劉時俊黃起龍御史蔣  
貴汪懷德吏部主事胡嘉棟等以不及浮躁不謹降黜  
有差數人皆東林貽書功郎董可威極力保護者怡神  
殿災會諸臣全疏復疏言目前政務孰過京察軍政二

疏不報壬子會九卿疏請東宮及時出閣講學疏留中  
以戶部主事賀世壽風聞指摘乞致仕有旨稱其學行  
慰留之先是南御史周達叅論徐縉芳于玉立沈正宗  
附會東林排擯異己賀疏駁之謂達疏本御史徐兆魁  
兆魁又本繼偕繼偕謀接輔臣李廷機之脉授意轉論  
三人除不附己者且誣繼偕于海上掠貨爲謀大拜地  
帝知其謬不報會朝推閣員忌者恐資次及繼偕故先  
發阨之雖奉旨慰留不獲安其位再疏乞歸適南禮部

杜門不入署內閣復題改禮部侍郎協理詹事府繼偕  
仍將印咨朱侍郎兼攝遂發南京舟次燕子磯御史魏  
雲中疏論徐兆魁波及繼偕謂前經賀世壽彈論不宜  
復改清華蓋忌繼偕轉北者囑之不知請告已在先矣  
抵家再乞辭并請罷斥時廷推閣員冢宰趙煥舉繼偕  
以吳人翁憲祥沮不果於是南北言官吳亮嗣彭宗孟  
田生金孫光裕過庭誚官應震唐世濟田一甲郭一鶚  
等各發憤不平疏稱繼偕南察至公卽有曲庇私人多  
方陰沮者一時同聲邪正益明比趙煥以湯兆京爭年

例去繼趙爲冢宰者迫於公論乃推繼偕吏部右侍郎兼翰林院侍讀學士三辭不允始至京視事仍兼掌尚書事值考選行取科道官前署部事李汝華已先定去畱繼偕或省或臺悉依所擬其公論未叶者量授部郎而媒孽滋生八月尚書趙煥到部歸部印已未與煥考察朝覲官倣周官六計訓廉爲主降黜有差察疏出繼偕手是年命爲會試考官韓爌副之取莊際昌等三百人會帝選用閣臣趙煥集九卿推舉七人繼偕與焉七

臣議方畧跪候至晚方退嗣楊鎬與遼撫周小春復告  
急繼偕同煥率吏部四司赴文華門跪請速下前疏簡  
輔臣補大僚下考選并用各處巡撫統援兵備禦京師  
至晚宮門下鑰退十三日仍率四司題疏爲時事甚危  
聖心益怠大禍將至舉國爲憂三懇聖明及時用人以  
保宗社事跪至晚十四十五連日跪候自是八月九月  
初八九日越明年二月俱累次同九卿科道跪請御殿  
召廷臣圖方畧均不得旨六月給事中楊漣追論一甲

一名莊際昌廷對卷一字差誤而取鼎甲考官私其門人當罷斥不報是年再疏乞休移近郊寺以明必行帝遣官諭留七月自寺拜疏辭朝即日南發至浙邸報陞東閣大學士與沈淮俱差官催取入京同方從哲入閣辦事是時神宗已升遐至家朝夕於月臺寺哭臨十二月以宅揆重任量力難勝疏辭天啓元年三月又辭六月差官促就道至涿州聞御史劉芳論列疏病乞歸有旨促趨朝劉芳橫詆鑄俸到京朝見戶部阮大鍼復追



一子入監賞銀緞給應得誥命又以陵工告成加銜蔭  
賞如前天啓二年三月殿試同葉向高等閱卷東閣給  
事中侯震賜叅論沈淮並謂繼偕聞言充耳直入綸扉  
蓋劉阮餘論也遂疏辭讀卷且乞罷斥帝諭令勿以浮  
言介意而鑄侯震賜俸旋調外任傳諭入閣辦事與葉  
向高等總裁神宗光宗兩朝實錄天啓三年考察遵例  
自陳乞罷不允玉牒成加銜蔭子賞賚封典如初三月  
阮大鍼論東事并及泉州一錢會謂繼偕子主盟語極

醜詆繼偕疏辯且請勅撫按覈實帝謂卿挺身忠憤自能訓于義方無庸根究大鉞復疏攻有旨地方事自有撫按奏聞何得連疏撫奏輕詆重臣大鉞乃不復言帝諭繼偕入閣輔政而繼偕疏凡五上俱蒙溫旨慰留是時一唱羣和刑部解學龍張鵬雲御史練國章胡其俊攻擊愈力帝一一批斥繼偕復連上至第九疏俱有旨慰留嗣南京御史陳必謙涂世業吏科蒲權復牽綴邪會事指摘是時諭旨愈諄言路復多譴謫其勢相激不

子中書舍人差行人護送馳驛賜銀一百兩彩緞四表裏大紅蟒衣一襲疏謝出京是時光宗實錄成復加少傅兼太子太傅廕一子入監讀書抵家刻父叔棲雲巢雲詩草而以已所咏怡雲弟世稷淡雲編并梓之題曰太史一家言又哀八閩人物四卷曰越章錄又刊自著雲臺藏藁十六卷奏議四卷崇禎二年以奢僧蕩平加少師兼太子太師年七十五卒加贈少師兼太子太師諡文簡賜祭葬又追贈左柱國太師兼太子太師特晉光祿大夫禮部尚書文淵閣大學士蔭一子中書舍人

通志參  
年譜

林學會字志唯號省庵晉江人萬歷戊子舉人壬辰進士

授南康府推官擢為吏部考功司郎中周歷四司疏陳

東南水患乞遠注唐堯遇災思儆亟簡賢才共濟時艱

尋引疾歸郡守延與黃鳳翔等纂修府志甲寅起太常

少卿天啓中累官戶部尚書致仕歸問業者屢滿閩省

直指使者張巡撫熊特疏于朝畧云林某孔孟真詮周

朱正派不愧理學名儒年踰八十猶朝夕講誦不輟學

韓魏公之爲人宜時加優禮恩錫部覆奉旨命有可過

炤存問闕自司馬林文安瀚至學會百二十年僅再見  
焉崇禎甲戌年卒年八十八學會孝友天植學業庭授  
方髫齡已具有道氣象生平自誓一字不輕出一錢不  
輕入歷官所任皆以趙清獻一像自隨苞苴請託望風  
遠卻神宗時每呼曰林秀才其以清白受知如此居恒  
與李廷機相嚮慕廷機被攻時人勸避之學會恬然如  
故嘗語人云吾鄉不可一日無文節使少年有所敬憚  
宦三十餘載未嘗一刺投有司雖至親不少假借室僅

蔽風雨門可羅雀兒童走卒咸知有林夫子年逾七十  
猶燃燈夜讀或達旦不寐終日危坐未嘗跛倚逢人循  
循善誘開陳懇至曠若發矇所著有史評警語潔身亭  
說皆論學正派又有孝經詮解批點小學編諸書

通志  
參筭

堤  
集

丁啓濬字亨文號哲初繼號蓼初晉江人自申孫由德化  
庠領萬歷戊子鄉薦壬辰成進士授寶慶府推官莅事  
精詳宿案疑獄一讞立剖積猾老胥為咋舌有半神仙

之... 安... 巡... 與... 俱

丁外艱起補杭州府推官上官倚如左右手檄署仁和  
篆辭焉入爲戶部主事籌邊措餉循舊典酌時宜裒決  
如流上下稱便大司農趙南渚深器重之差樞關及典  
楚試俱辭趙公亦不欲其一曰離部故不之強會吏部  
缺員趙公力言于冢宰轉文選司主事且謂啓濬曰子  
清通簡要衡鑒倫品舍子誰任吾豈以版曹一職淹賢  
者路及履任則以振拔幽滯爲已任稍遷考功員外司  
察內外門絕苞苴澄敘無爽假歸省母旋即起用周歷

四司最後卽家起文選郎中未行丁內艱得親含飯人  
謂孝感服除仍補文選郎中公慎素著吏不敢欺以弊  
人不敢干以私益兢兢慎名器惜人材獎恬抑競期無  
負職守神宗深居靜攝章奏多留中不下啓濬佐太宰  
凡會推行取起廢陞遷選補一疏不得請至再再疏不  
得請至三蓋荷俞旨十七八而銓政賴無叢脞秩滿擢  
翰林院提督四譯館太常少卿有掌科某當啓濬握銓  
時推補右納言有所屬不應至是遂以選事効之調南



豐樂醉翁二亭閒未幾遂告歸崇禎初召爲南太常寺  
少卿旋陞太僕正卿晉刑部右侍郎轉左時刑部都察  
院二正卿俱缺兼理二篆

在都察院擬

差某御史督學北畿已咨吏部矣而某求改南畿屬一  
掌科爲言以咨訖辭之掌科笑曰咨在也出自袖中蓋  
密向太宰索回者啓濬駭然曰言路之橫一至於此堅

持不可時方治魏崔黨蘇州織造太監李實嘗以一疏  
達周起元周順昌繆昌期等十三人斃詔獄啓濬讞擬  
大辟帝御便殿問實罪何以坐重對曰實出片紙殺十  
三人又悉國家清介忠亮不貳心之臣罪惡容道帝曰  
此魏忠賢罪于實何與啓濬對雖忠賢意疏原出實手  
帝曰當忠賢煽燄時誰不爲頤指寧獨實夫實疏墨填  
硃上蓋忠賢取空符紙以肆螫也實罪如是虎彪又何  
以處之啓濬奏謂虎彪稽誅以未逮至耳帝命閣臣從

帝未霽顏諸大臣咸股栗目懾啓濬徐奏曰好生者人  
主大德執法者臣存職分臣據律定讞惟上裁奪帝意  
稍解命之出翼日實得減死屏遠方諸附闔案續告竣  
適溫體仁入相啓濬遂以病告歸會推刑部尚書者二  
總漕尚書者一俱報罷生平事親孝養備至居喪哀毀  
骨立營葬躬自負土篤愛兄弟先業盡推畀之祠墓則  
獨肩焉族中有婚喪及不能舉火者周給無倦視疎戚  
爲差遇士流雖婁賤必優禮之自幼至老手不釋卷凡  
歷代沿革典故諳練習熟故歷試咸宜葉向高謂其如

魏相好條秦漢興以來典制有大事可屬焉林居值海  
氛存警撫軍陳師至境式其廬凜取成算獲底寧謐先  
是白太僕告歸時見德化民上倉永寧衛山海遠隔每  
挾金至泉市穀守候維艱又縣令歲領郡金積穀其縣  
民鮮儲蓄歲僅足支買穀無所而德化道可走尤溪達  
於京師繕紳利便爭趨地無郵置每捉農民應役有棄  
耕逃者啓濬一一告於當事請除之惟尤溪之路額派  
能肩任者數十人以待上官之行餘槩勿應又請增德

仕以丰裁著其他因文以决苑枯多奇中年六十八卒  
於家贈刑部尚書賜祭葬蔭子所著有平圃文集詩集

行于世

通志叅  
文集

問山  
宦夢錄

李叔元字端和一字贊字號鹿巢後號馴鹿晉江人木齋  
古先生聰元孫也萬歷辛卯舉人壬辰進士觀政戶部  
奉差轉餉十萬往宣府報命無緩期初授刑部主事有  
巨璫籍沒贓波十萬於崇信伯奉旨鞫追江西司官禡  
丞殆盡叔元以貴州司兼理堅任弗辭心知其寃臨審

不拷訊每日輕棧家僮五人無戚容邏者以聞帝默然  
後果以虛誣赦免奉差江北審決供結招由一字不敢  
忽畧不貸者立服刑可矜者爲昭雪平反獨多大司寇  
及內臣臨讞無以易也五載刑曹虛心定案不枉一人  
雖風雨必至署惟恐犯人淹滯擢禮部儀制司郎疏陳  
建儲國本自二十七年十月至明年八月持議先用立  
後冠婚凡二十上俱奉俞旨有一月四上者政府駭然  
儀注俱親擬定後依之又畱心校正潢牒婚封典禮撰

罷礦稅語甚婉切廷論推之出督學山東屏絕關節每  
以忠孝廉讓訓戒諸生山左爭自濯磨文體士風翕然  
丕變所得士銓垣館閣臺省彬彬蔚起遷浙江分巡溫  
處道簡樸精明力追古道嚴覈吏治吏凜民懷尤加意  
作人捐俸課藝手自較正續豐相編以式多士置學田  
以振貧乏士民祠祀立碑轉糧漕叅政建倉徵兌豪右  
帖然購木造船充數年之用慎選押運官屢次俱頭幫  
過淮南北督儲冢宰交薦之擢江西按察司革畫舫以

端風俗黜輿援不避反噬備大計冊彰瘕允當撫按銓  
宰無所更清郵亭驛遞與閩封毗壤巖定界水無許混  
擾順昌民立生祠朔望頂禮陳臬平允政績丕著人稱  
神明刊有祥刑錄陞湖廣左布政值滇蜀黔三餉羽檄  
旁午轉輸計三百萬又頒五府宗祿新建桂藩邸殫力  
支撐不至告匱而轉運絡繹人心騷動商於撫院亟馳  
疏豁免運夫十二日至京奉旨允准計省楚一百五十  
餘萬金全數百萬軀命其公心正席以端吏治始終如



遂毅然力爭掛冠歸是年大計有欲擠之而輿論推操  
守無異議竟晏如崇禎初元起用光祿寺卿兼太僕銜  
旋歸田屏跡郡邑動履遵先輩扶植正論以紫陽爲宗  
置義粟百石以賙恤族戚貧乏爲閭里捍患興利清溝  
塘以資灌注鄉民德焉卒年七十四贈刑部侍郎所著  
四書春秋傳藁春秋彙語雞肋剛三餘存稿萍踪萍根  
諸集兄伯元戊子鄉薦景州守次兄仲元辛卯同榜經  
元寧津令子正培壬子舉人次子正高蔭南監典簿歷

南京後軍督府都事孫璜曾孫一鳴皆舉人

通志叅張四知范復

粹撰傳浙江通

志處州府志

洪啓睿字爾介號訥原南安人萬歷乙酉舉人壬辰進士

授禮部主事首發沈惟敬之奸疏大司馬石星誤國經

畧朱應昌等扶同欺蔽復上冊立東宮救于孔謙陳泰

來顧允成二封事署儀制時大璫以封爵爲請睿不允

璫銜之及璫負罪始擢祠祭司郎中督學兩浙章程約

束無所貸轉金衢守道察吏戢奸蕩滌苛煩陞按察使

擢符入觀凡清史中蜚語者悉爲昭雪保全善類甚多

尋轉左屬浙東飢浙西澇殫力贊襄捐俸佐之請蠲請  
折請賑疏咸報可庚戌計典竣乞休歸作還山十誓誠

子弟禁僕隸約里戚奉法維謹郡邑長鮮謁見惟窮交  
數輩時相過從甲寅乙卯水災餓莩溝瘠愴然恤之居

家澹約而祖祠祭器必修必備事兄如事父友愛性植  
老而彌篤壽六十一終子承紱庚午舉人

通志參南安志

蘇茂相字宏家號石水晉江人御史士潤姪萬歷辛卯壬  
辰聯第進士時年方二十六授戶部主事首上疏請朝

講出使山東見飢民以賑卹請或疑其出位茂相曰飢  
溺由已豈異人任耶權濶關額外多縱舍行商德之爲  
樹碑丁酉典試貴州假歸省毋復命出爲彰德守俗好  
格鬪爲剖善惡報應圖邵康節孝弟歌曉勸之趙藩祿  
入不時常與守闕郡庭如市茂相悉用邑解原封先時  
分給天潢誦義臺使舉卓異第一遷河南副使備兵汝  
南政聲懋著民尸祝焉督學江西下車首嚴請託有故  
輔以三牘進不發函而榜其人輔怒遂掛冠歸所拔士

姜被如一日趨庭之餘鍵戶讀書著作不倦郡太守禮  
請與黃鳳翔何喬遠林學會李光縉仝修府志兩院題  
疏以孝友特聞晉南尚寶少卿陞太僕寺卿核俵解清  
牧場蠲落地稅馬政一新擢僉都御史巡撫浙江首疏  
請減免織造停差織監又請節大婚冗費皆言人所不  
敢言杭城火災浙東西水旱頻仍請免加派及災籍稅  
並發倉穀賑濟新派袍段五萬七千五百餘疋需銀一  
百一萬六千九百餘兩并歲改造着歸司禮監李實疏  
請分爲二十運每年春秋二運並酌畱米折草折弓箭

弦條等銀以紓民力歲改造仍遵舊制歸有司織解並  
劾李實不得以屬禮凌有司遼東撫臣王化貞以邊事  
急奏調浙陸兵一萬又請調水兵八千疏請練陸兵免  
調水兵皆激切敷陳台州水兵王元尤成以股糧毀總  
哨署旋擁入郡城焚屋放囚稱亂卽疏黜大帥王良相  
叅將楊維垣而密授計副使張師繹擒梟之時官軍驟  
聞調發悍弁驚卒鼓噪倡亂有哨官陸敬趙鳳等糾兵  
於寧波餘姚等處折毀民屋大肆搶掠執械踰城逼挾

脅從者出示免究法紀伸而人心以定於是梟斬亂  
兵疏昌國哨官蔣良忠遂哨總王翼覲代其任嗾兵樹  
幟以保賢能爲名而拒代者施應奎或言宜暫用良忠  
令戢亂茂相曰如此則唐卒自立畱後之勢成矣檄副  
帥張可大之昌國觀變而令團練把總楊懋忠出不意  
縛良忠杖殺之并擒亂兵洪辰等正法廢弁賈祥稟請  
捐貲集舊部家丁五百名赴山海關救援藉部劄招聚  
白徒數千無藉且爲變茂相諭散其半覈其半資之行

糧督出境傳檄諸路約束無敢侵掠又有紹興錦衣衛  
鎮撫吳有聞亦齎兵部咨文爲造蠱繩法請動浙省遼  
餉并鹽羨銀十萬兩開設幕府賣千把劄付聲言動支  
錢糧召募兵士茂相嚴行禁諭請速勒令回衛於是  
有題賈祥等募兵疏又所募兵萬人每名給銀十六兩忽  
邱報募兵疏有云每兵二十五兩遂各紛紛求加茂相  
諭以未經部覆仍與司道商酌量加銀二兩五錢遴委  
原任廣西添註叅將袁應兆督率起程申明紀律不許

途中擾亂脫逃於是督兵各行疏每寇王鍾王錦等



曠聚剽劫給印票質人取贖官兵追剿則遁入深洋收  
回復肆出行劫出沒閩浙之交往來日本諸島茂相與  
巡道賈允元商榷督剿一戰用彈打死香公老等九賊  
再戰擒渠魁三大王首級被傷溺死五老等十餘賊三  
戰殫死榮我老等各賊餘船遁散復檄各鎮協官軍協  
剿嚴禁奸人接濟使寇糧匱乏王鍾等窘而乞降計四  
百餘人分發効用及解回原籍海氛以靖於是有王鍾  
等歸順報捷疏擢兩淮漕撫將移鎮而妖賊葉朗生之  
變起助生湖州人妖醫馬文元高弟聞山東白蓮賊反

其黨邱大虛等舉事以攻白蓮爲名徑于湖城中索豪  
家買命錢亡民駭竄湖守杜喬林急捕朗生飛報幕府  
茂相檄水兵乘夜鼓行復發一虛檄營兵三千繼之詰  
旦兵至茗衆訝神速人心稍定因以次捕誅而文元猶  
挾宦家子陸鍾奇逃松江馳檄合捕之吳越底定揚州  
老庫久不會璫一旦借大工爲名搜括二百萬而屬運  
司且八十萬遣璫胡良輔劉文耀守解疏言得之傳聞  
者千萬無難入於鞘解者銖兩不易用一緩二不盡取

南通欠銀共三十萬九百以應猶不可則那解正項十

萬而下季卽爲扣除揚賴以紓奸弁劉魁乘寧遠急持

經撫咨取淮餉六千緡茂相曰遼中丞暮春四日受事

望日始加巡撫而咨署朔日僞也且篆文不類條十疑

鞠之立伏并得其戶部應天二僞檄一舉而省國蠹萬

八千金稱神明焉鳳泗爲湯沐陵寢重區水旱蝗相繼

下令捕蝗通商平糶復力爲海徐贛桃州縣請得改折

值河水壅閼舟楫不通躬禱河神一夜水滿丈餘糧艘

畢達轉輸京師無後期請建金龍四大王廟勒石河上

因條五議曰急回空早催徵備船袋輪水次改淺船而  
 淺船以杜奸旗攬貨之弊尤為緊要晉總督倉場戶部  
 尚書倉場與漕政相表裏茂相入督倉益明諸利弊而  
 添設督餉部臣于天津其人墨而狡輒藉遼警以截漕  
 為辭而以帶運遼糧抵補蓋漕糧累經核晒正額外有  
 尖米耗米而遼糧例不晒揚無尖耗一截則皆入其橐  
 津募舟往遼每舟二百金四百舟需銀八萬既誑米復  
 誑金而以空單折色授受海外以故不截不止其賄最

重而平糶文為尾有規畫曹益屢且益詳方設糧則旋

以楊聞莫可窮詰茂相連疏以職掌力爭畧曰查萬歷四十七年至天啓七年津門截漕連尖耗計三百七十八萬自天啓三年起每年始帶運遼糧三十萬石抵還尚少二百二十餘萬皆成泥沙矣且臣督倉十月而津已入截始猶有帶運可抵餘更何抵乎遼餉自遼餉京糧自京糧豈可專以截漕爲事致根本坐困語極剴切當事明知而不能盡用也京軍月糧額放折色兩月部臣緣內璫剽應坤請欲少放一月茂相力爭謂太倉非渡江湖河不能入庾多放一月本色二十八萬倉廩益

虛請恪守祖制仍其舊復疏言錦衣衛官旗萬歷末僅萬七千餘名自逆璫與田爾耕亂政增至三萬六千餘名文思院匠官冊載僅七百餘名今三千餘名歲多支米二十五萬石鴻臚帶俸序班冊載百七十二員今五百二十七員歲費俸米四千有奇官俸非漕糧比外解止蘇松常三府三萬餘石耳且冊中如魏田客崔諸姓皆奸黨清汰當不俟終日莊烈帝皆立行之既改刑部尚書疏辭有品望端證明允夙著爽鳩正席倚毗方新

之旨鞠魏當逆案置碎後書一出乎定天下專焉復請

斬改徒方震孺以御史監遼軍不宜比守邊將帥例惠  
世揚不宜引交結近侍律皆得免萬璟劾逆璫築墳僭  
擬皇陵矯旨杖死後坐贓三百已追解至京令原解官  
領回還之帝召對令大臣各陳所見疏言刑部宜令辦  
事進士同各司問刑選有才品者優與陞調各司到部  
未一年不許借事回家錦衣衛慘刑宜汰而以防內侍  
預政蠲租飭邊爲第一義又引畱忠宣對敬帝有曰但  
得事事如今日與臺閣議當而行久之自治不息則久

至於博厚高明配地配天爲皇上望皆溫旨褒納焉加  
太傅旋以老病乞歸三疏准馳驛還鄉帝渙絲綸賜之  
顏其堂曰賜美儼對揚也崇禎三年春卒賜祭葬祀鄉  
賢茂相恬靜謹凜藏才不露其撫浙率皆出突徙薪防  
患未然陰全數百萬軀命而人若不知請褒贈方孝孺  
錄其子孫請恩卹知府吳寶秀並妻陳氏皆維持名教  
勸勵將來督漕督倉釐剔諸弊讞鞫逆案大快人心諸  
所敷陳莫不確切時政有裨國家所著有皇明寶善類



亂紀畧東征行稿係約全書詩集五卷浙草淮草葵雲

草弟茂杓

採蘇氏家傳叅敬日草

石水集李鹿巢文集浙江通志

趙世徵晉江人恒孫日新子萬歷辛卯舉人乙未進士授

大理寺評事轉寺副寺正出爲袁州知府繼補安慶加

意拊循政成譽浹轉廣西按察副使振綱肅紀名著嶺

嶠遷雲南布政司右叅政益勵清規期宏遠畧播德陽

和振飭風稜歷廣西巡撫樹猷固圉率吏綏氓及歸橐

無百金人比之趙清獻

蔡復一字敬夫號元履同安人用明子萬歷甲午乙未年  
十九聯捷進士給假歸娶授刑部主事歷員外郎有所  
平反多出其判丁兩艱服除補兵部車駕遷武庫郎中  
每陳籌邊事宜司馬採以入告久之遷湖廣叅政分守  
荆岳清積逋覈虛冒革加派足軍糈嚴保甲禁驛騷杜  
叅謁壬子癸丑雨驟江漲堤蕩盡決極力賑卹時三道  
並缺奉檄兼署辰沅諸郡多積逋兵乏餉三年呼癸脫  
巾在途檄諭之兵素服其威信諫始輯亡何鎮筸諸營

首禍七人正法鳴張始息進按察使大小五冲苦苗恣  
攝兵備篆十月三度報捷復築邊牆七十餘里又黑苗  
屯鎮遠偏橋開官道爲梗出牛酒令兵民誓相應援道  
始通會黔撫有大征紅苗之議檄永順保靖二土司助  
蜀土司攻之復一云狃苗禍專在黔黑苗害楚淺而害  
黔深紅苗毒蜀蜀宜角之今黔代蜀憂不以黔殉而逼  
楚殉之毫衆葛耕烏能保以鄉鄰挺纓冠之鬪大拂黔  
撫意遂引疾歸時已推河南布政楚人請以加秩畱原

任旨報可而復一堅辭回囊中如洗抵里猶未有居光  
宗卽位起備兵易州遼陽報陷出俸金募鄉壯修器械  
爲備而京中諸貴人造妻子避難乘露縶繹下檄非奉  
廷遣悉裁其符銜者疏誣其聞變涕瀝襁一上章自理  
且揭云請以兵加頸誰先皺眉請同過三岔河誰先縮  
足又云必書帕關說之外方有真人品言者大慚擢山  
西左布政以病告爲納言所格南返聞河西復陷歎曰  
茲豈臣子養高日哉力疾之晉時邊糈緊急加派難堪

以正額民爲樂輸宗祿邊儲原緡給發在任凡七閱月  
天啓二年以右副都御史撫治鄖陽益勵清白無敢餽  
送者值生辰有監司獻一筵峻卻之歲大旱步行祈禱  
自狀其罪布衣素冠坐繫於獄是夕遂大雨寮屬士庶  
迎之乃還院鄖賦萬金加額至四萬餘復有舊逋七萬  
餘疏請免之覈屯額肅軍實飭吏懷民種種畢舉三省  
視爲領袖奢崇明安邦彥反貴州巡撫王三善敗歿進  
復一兵部右侍郎代之喪亡之餘兵食盡絀斗米銀八  
錢復一勞徠拊循人心乃定尋代楊述中總督貴州雲

南湖廣軍務兼巡撫貴州賜尚方劍便宜從事節制五  
省復一乃召集將吏申嚴紀律遣總理魯欽等救凱里  
斬賊衆五百餘賊圍普定梟賊開陳其愚以殉遣叅將  
尹伸副使楊世賞等合擊之邦彥負傷而逃遂搗其巢  
斬首千二百級發兵通盤江路斬逆酋沙國珍及從賊  
五百已大破賊汪家冲斬首二千欽等復破賊汪家冲  
蔣義寨斬首二千二百長驅織金織金者邦彥巢也緣  
道皆重關疊隘木石塞山徑將士用巨斧開之或攀藤

以鄰境不協討致賊未滅請勅四川出兵遵義畢節抵  
水西雲南出兵霑益抵烏撒犄角平賊帝悉可之因命  
廣西雲南四川諸郡鄰貴州者悉聽復一節制六疏請  
益餉未下而施州遵義兵萬餘始至衆議因銳渡河復  
一戒勿深入令渡河六十里劄谷里驛酌進止乃兵甫  
渡河而施兵先逃二千餘魯欽謂師退必散不如直搗  
其穴遂徑趨水西遇賊數萬力戰破之斬馘千餘次日  
霧賊來襲戰卻之是晚施兵先潰賊從後襲擊諸營盡

潰死者數千人時復一爲總督而朱燮元亦以尚書督  
四川湖廣陝西諸軍以故復一節制不行於境外欽等  
深入四川雲南兵皆不至復一自劾因論事權不專故  
敗巡按御史傅宗龍亦以爲言廷議移燮元督河道令  
復一專督五路師御史楊維垣獨言燮元不可易請令  
兼復一任帝用維垣言解復一任聽勘而以王城爲右  
僉都御史代撫貴州復一俟代仍拮据兵事與宗龍計  
剿破烏粟螺蝦長田及兩江十五砦叛苗斬七百餘級



見雲南出師懼約邦彥犯曲靖尋甸復一遣許成名往  
援賊望風遁長田苗曾天保阿賈約水西賊欲斷平越  
餉道復一在病中曰一息尚存豈可以賊貽君父憂檄  
諸將分路進剿遣劉超等生擒保賈織賊首五十餘名  
破百七十四砦斬級二千三百五十有奇平越人謂入  
二百年不到之地成二百年未有之功而西賊失一大  
臂矣捷報正患瘧痢扶病至平越愈劇猶上捐俸助工  
疏十月卒於平越軍中訃聞帝嘉其忠勤贈兵部尚書

賜祭葬諡清憲蔭一子官廷議欲諡以忠不果避魏瓘  
名也復一學博才高下筆千言兼工四六他諸著作皆  
崇論宏議涵古如今至書牘奏議之文慷慨談天下事  
切劘豪貴披吐肝胆而詩則出入漢魏唐宋閒居然一  
代名作生平耿介負大節有志聖賢之學經濟文章特  
其緒餘人比之張襄惠嘗自易州貽何喬遠書曰宮事  
則客媪與魏闕相表裏朝事則牛李構鬪疆事則經撫  
矛盾而戰守無穩着此三憂也淮南憚汲黯江左有夷

論克已謂惟克已乃由已又云某生平服膺三言報國  
恩以忠心擔國事以實心持國論以平心又云某惟學  
正已不求四字耳所著有遯菴全集特祠鄉賢

闕書叅  
明史貴

州志鄖陽府

志晃巖集

林欲棟字世隆號狎漢晉江人武苴子欲楫兄萬歷甲午

乙未聯第進士時方二十五歲授南戶部主事委掌太  
倉銀庫及榷關皆力辭丁內艱奔往粵西扶櫬歸越年  
丁外艱與弟經營父母葬事六年服除補戶部河南司

主事司權吳會朝令諸關各加額一萬諸關各於則例  
遞加欲棟首罷之平量頭革耗羨通便民之橋除港門  
之稅商民頌德差竣還朝得紀錄值河決河臣侵借餉  
金百餘萬適邊地告急遣催督之欲棟籍河臣借數以  
聞且疏陳兩河困苦狀求罷礦稅有旨切責河臣屬當  
公主婚期大內索珠寶甚急廣東司司篆者已被譴去  
諸司相誘莫任大司農以委欲棟委曲調度不激不隨  
中官督逼絡繹無以罪也轉廣東司員外湖廣司郎中

送假歸越二年補浙江司郎中大司農孫璠藍石初入部

卽問前年爭珠寶進價者安在司廳以對立召入本科

章奏多出其手旋以妻久病仍假歸越二年卽家起四

川叅政川中多盜劫每一獄輿株連百餘人累斃相望

欲棟鞠其情真罪當者置之法餘悉解免全活無數復

立鄉總以明賞罰嚴保甲以申救援盜患稍寧值司道

並缺身佩八篆方員並晝游刃理解以卓異薦遷湖廣

按察使已未當上計例當兵憲盧應朝入京以母老有

難色時欲棟已擢江西右布政慨然代行有景寧丞倚

其兒在南臺貪橫不法自知大計不免求爲解叱去之  
庚申轉江西左布政舊例錢糧起解司止轉文毫不經  
手司計者夤緣爲奸或私加重傾或短少分數爲設法  
嚴杜諸弊宗室祿額止十萬而花生冒支者且溢二十  
萬前此率于正項那借欲棟始定爲限祿之制又淮解  
一差苦賠累解役互推緝差頗有贏餘則請託闕然欲  
棟定爲苦樂相兼之法請託不行解者稱便江紳豪僕  
事于不法繩之不少貸轉南京光祿寺正卿晉工部尚

世諸墳先是曾祖歿時適遇火權葬于鄉之大墩歲月  
既久鄉民葬者纍纍或謂當令遷去欲棟曰彼亦人孫  
子也我墳一而彼墳多我有力而彼無力若當遷我自  
遷耳遂改葬于仙景山族戚不能舉火婚葬者周之幼  
孤者撫之成立遇歉歲輒發粟貸鄉里價平收還貧者  
勿問陳江水不通潮田畝數千常苦旱爲買田濬渠從  
流引潮水入新淮以通灌溉生平淡泊自將食經數進  
衣經數澣爲文如萬斛泉湧有撰著均可名家尤精賞

身少尺一  
卷之四一四  
鑒戊子赴省延平游生從旅店相識問今科誰壓榜者  
以潘洙對癸卯弟欲楫赴試貽書謂三試必有一元會  
殿不可知其秋闈乎已而皆驗仲弟困儒冠以勳卿得  
蔭輒推與之弟歿撫姪若子年九十卒子期昌崇禎丁

丑進士

通志  
參林  
平庵撰述

黃國鼎字敦柱號九石晉江人萬歷己卯鄉薦第七名戊  
戌進士選庶常第一授編修同修國史管理起居注編  
纂六曹章奏丁未分校禮闈用封楚藩向多弁髦使者

國鼎至楚先徵其王相曰有不肅將以聞行事之日王



以下罔不祗敬。猶遺一無所受。漢陽王知其廉。惟獻瓜  
桃而已。巳酉。與試。浙闈得士九十人。多登第。庚戌。殿試。  
充受卷官。管誥勅。時李廷機避居荒廟。縉紳絕跡。國鼎  
日一視。或再視。卒以此中。蜚語上疏。求去歸。五年。撫按  
疏薦。境內人才。授左春坊左中允。擢左諭德。兼翰林院  
侍讀。辭不赴。國鼎孝友。恭讓廉潔。慈祥而峻。特凜冽之  
操。屹然山立。庚辰。下第。入闈。聞父病。五日夜馳還。戊子  
以母老不赴。公車均得躬親。殯殮叔父病。移就侍。一夜  
十起。在京蒿目憂時。有擬講學。疏擬東宮出閣。疏擬罷

礦疏東征救朝鮮有議撤川貴兵有議有議邊有議河  
有議採金海上有議代府封爵有議收亡賴子爲客兵  
布諸公閒以備言官採擇官翰林時編纂章奏一字不  
敢造次日吳日國史所取材也丁未禮闈念同里多習  
易請改閱詩經避嫌將折卷置房首皆南士首易北卷  
以平之自諸生時卽屏外事與士大夫交毫無忤求子  
爓冠出其所冠時衣衣之曰此吾冠而祖衣我者也京  
中鄉舊姻戚疾病死亡衝風冒雪百爲經紀拓修會館

竊受賄代請急馳書將軍驅逐之故大司馬張經有禦  
倭功而不免於罪俞大猷戰守有勞被湮抑皆昌言於  
朝得不沒福山令韋公尋甸守蔡公先後忤礦稅逮繫  
百方周旋無所畏避直指張公自滇按閩稅璫切齒聞  
其離滇誣奏之國鼎求政府爲救免居家潛心克己戶  
牘駢對類多格言足跡不履政府地方利病則數言之  
而人莫知臨終手書數語云叅合於太和委運于適然  
默還造化再度乾坤不憂不懼順受其正所著正集外

有四書質問易經初解左國迂評

閩書叢

景壁集

王畿字翼邑號慕蓼晉江人少遭倭寇父繫于賊挺身請

代幾中賊鋒田廬甌脫父母遞亡竭蹶以事祖父母農

賈工藝靡不備歷耕樵之暇諦聽鄉塾讀書聲欣然有

得丐殘書而熟復之遂貫徹易學旁及諸經爲文多獨

據萬歷甲午鄉薦第一戊戌成進士授餘干令不赴改

紹興教授與諸生講易履恒滿雲南聘充同考官殫心

校閱錄文半出其手攝上虞令導民不爭新令至解歸

斛版席帚斗稱之大司農得未曾有大奇之將薦調辭  
曰此自公家有某奉職而已以此博美秩如前後政何  
丙午典試四川識拔皆英俊錄文允傳爲鵠甫至上谷  
卽疏陳鹽商不納粟而冒引之弊宿蠹一清遷杭州知  
府始至值大水飢民毀閉糴之室鬪撫軍之門未能制  
畿談笑揮之市肆貿易如常已乃下令賑卹躬行勸課  
濬南湖湮塞數十處以資灌溉臺使奏聞詔賜金勞之  
其他讞獄雪冤全活甚衆計吏者以天下治行第一用

異等錫宴光祿命督學浙江賓興期逼只攜一二謹厚  
胥吏自隨躬自甲乙焚膏繼夜徹首尾批閱無漏甫半  
載十一郡科額錄遺三試如正考士論咸歸姚江所首  
拔施邦耀貧不能婚爲備聘拜雁於官署後登第殉節  
世益服其知人擢江西叅政晉觀察五載皆董漕儲振  
彫祛弊軍民支兌咸受利故江漕逋獨少而完最先陞  
山西右布政道轉浙江左布政時邊事孔棘兵餉繹駭  
重以織造之役糜金錢逾百餘萬屢奉嚴旨督責畿上

吏士民連上詔三臺願借王使君三臺敦畱疏覆有旨  
回籍調理痊可奏薦起用給覃恩三世蓋異數云抵家  
益肆力易學由蔡文莊蒙引以窺程朱之祕卒年八十  
有二當事者采輿論與陳紫峯蘇紫溪俱特祠祀于學  
宮江浙亦舉名宦所著有四書易經解樗全集其門人  
施邦曜梓以行世年久散軼梨棗無存乾隆己卯其裔  
孫宗敏復取樗全集舊本校訂而重刊之

通志參蔣  
若櫛撰傳

張維樞字子環號賢中晉江人萬歷戊子舉人戊戌會試

第八名成進士授孝烏令盪滌煩苛畱心撫字郭外溪流環漲民苦病涉繕橋爲百世利不費民間一錢歲旱給粟賑濟全活千餘家烏本樸陋爲建塔築亭材秀士而簡其藝所賞識者薦歷甲乙科人文一新豪有力者噬一孱儒理官希上官意欲周內之樞曰殺人媚人天可欺乎吾不敢枉三尺以媿寸心竟脫之爲當事齟齬賴監司觀察伸解癸卯分校鄉闈所得皆知名士行取解任攀轅數千人尸祝不衰陞刑部郎中訊鞫平允每



爲計畝均役蠲單弱抑豪右闔郡稱平常延紳士談易  
闡奧詢地方利病立爲疏淪府試所取前列皆鼎望相  
繼登科第郡有沈寃權勢主之力能傾撼有司莫敢發  
樞誓神廉其狀立置之法百函踵至屏不入已復傾財  
結炎譁噪長安而公論大明廉幹之聲益著陞湖廣僉  
事宗室張甚控軍民之半而輕犯法自趙中丞遭毒諸  
僚長拱視莫何樞縛其二三巨魁繩以法申撫按題請  
得旨分別戍辟三楚帖席嗣備兵山西簡練兵馬繕葺

邊牆營田積穀築橋設堡答酋不敢闖入清草場以資  
芻牧釐衛田以佐輓費曾素囊卜石免挾市賞虎噬鴟  
張馭以恩威皆懾服相戒不敢犯邊制府推爲邊功第  
一復輯志乘著備邊十警孫武子解引示武弁俾學古  
兵法朔望集諸生課藝自此文學彬彬以病告歸研窮  
濂洛理學諸名宿請業屢滿天啓五年起陝西隴右叅  
議轉河東數馬驗軍不遑啓處趨擢陝西巡撫振廢舉  
墜務安蒼黎舊轅門有屋百餘區取稅悉改爲營房軍

城藩封所受宗田多贖取爲者心措置公私不困賒進

瑾播燄概折講學書院樞力屏之嘗因天變陳疏指摘  
中官不法人爲膽寒太宰張誠宇以忤璫追助工銀十  
萬疏言先朝傲屨堪憐得豁六萬所屬以建祠請正色  
麾之秦中竟無祠璫者晉南工部侍郎莊烈帝登極入  
賀陳法祖入事多採行轉北工部崇禎元年校試禮闈  
時陵工鼎建入不償出有戶七工三之議樞謂戶工等  
耳陵工大役安可岐視條上十餘款語具疏中無何而  
有指容之謗蓋是時權宜開例奸商猾胥濫兌之利有

身少府志 卷之四十四  
虛容而無實銀樞必兌完始移容冀稍收實用以此冀  
器言者風聞連疏樞乃抗疏請九卿臺省會議有旨張  
維樞爲國苦心不大剖明何以服衆已而部臣議覆奉  
旨回籍閒住至家與諸同志質疑問難以戒愼恐懼爲  
提醒心法撫按屢疏薦不報年六十七卒所著有澹然  
齋文集詩集易測語類致知格物說諸集弟維機

通志

呂圖南字爾搏號天池南安人居晉江萬歷甲午領鄉薦

金邊疆蕭如再按浙江旋以僚屬構黨枝異告病歸泰  
昌初起南京通政司右叅議復以艱歸邑令稔其貧請  
沒寺租百畝爲贈卻之天啓丙寅陞北京左通政尋轉  
正使時璫燄方張有監生陸萬齡等請祀璫文廟李映  
日等請加九錫封王俱嚴駁不上莊烈帝賜勅有心事  
皎然守正不阿之語加左都御史旋改南京戶部侍郎  
總督糧儲是時江寧飢軍士聚衆囂譁變且不測上疏  
乞畱漕糧三十萬又截三關稅銀七萬不俟俞旨便宜

給發奮然以身家易數十萬軍民生命用是忤旨歸家  
居十餘年築白衣洋清洋陂二水利鄉人賴之歲時閉  
影齋居帙岩書史與修武榮清溪二邑志圖南善書法  
與張瑞圖相伯仲瑞皆悅之然圖南以自重完璞張以  
輕試貽譏璫既敗張歎曰不謂真男子竟被呂氏做成  
天乎人乎卒年七十二所著有周易四書輯說璧觀堂

文集數十卷行于世

通志參  
南安志

張廷拱字尚宰號輔吾同安人萬歷丁酉舉人辛丑進士

源奔命天啓中歷祠祭司郎中時朝中多依附權璫獨  
廷拱正言讜論非端人君子不與交遊削籍歸莊烈帝

卽位求舊賜環以邊才擢僉都御史巡撫大同召對稱  
旨帝顧近輔曰廷拱福將也至則給宗祿恤飢軍修土  
堡製火器邊計靡弗周密警告猝至禦變投機敵不能  
犯以焦勞成疾及亟諄諄諭戒諸將竭力報國言不及

私卒年六十五賜祭葬諡襄靖

通志參同安志

陳玉輝字達卿號荆碧惠安人萬歷庚子辛丑聯進士授

吉水令建四鄉書院與鄒忠介羅仁湖諸公表章道學  
講明心性行取兵部車駕司主事擢南京湖廣道御史  
巡視西城時神宗政多廢格首上幾務叢脞疏力請皇  
太子太孫出講福王就藩又疏請三王選婚謂嘉禮不  
可久稽屬旱奏准寬徭嚴究喇子夜微行親訪有喇首  
係董司禮之姪喇子數千幾釀釁拘論如法中城及東  
南北城百姓赴都察院求批俱歸西城管轄喇黨胆落  
解散按直隸屯田馬政河池故有三衛武弁土居江北



百六十二員退田二萬七十餘畝請旨治其尤而以三  
衛屬近有司帶管指揮千百戶盡調別衛另選調補條  
陳屯政要務請復祖制劾猾弁侵漁國帑貧軍遭水旱  
流離者請停徵旨下皆如疏屯卒歡呼秩滿按上江去  
之日行貲不辦同官贖金助之連丁內外艱熹宗初年  
起北京貴州道御史旋掌江南道管大計事風裁嚴峻  
書牘不入視事五月卒玉輝嫻裕經濟軫恤民瘼讀禮  
時惠城寇警疊至爲設法考籍計田使有田者出直給

貧戶協力固守士民立碑頌德後祀名宦鄉賢又祀南  
京鄭一拂祠所著有留臺疏稿屯政奏議文江政紀輟

耕錄適適齋鑑鬚集子龍巖

通志叅惠安鄉賢傳江用通志

莊欽鄰字寅卿號陽初晉江人萬歷庚子辛丑聯第進士  
授饒州府推官甫六月丁外艱起補衢州所至擊捕豪  
猾胥吏按獄虛公持平雪圖賴之寃破失律之議爰書  
皆成鐵案饒衢勒碑頌德建祠祀之分校浙闡得士潘  
颺春等皆先後登第行取授兵部主事陳軍政侃侃不

考選被擠歸天啓五年仍起掌銓值魏璫薰焰正色立  
朝無所屈時魏黨崔呈秀霍維華欲以恩倖躡加二級  
欽隣不肯破例以徇毅然力爭又裁璫之所役冒濫門  
功者七十餘人却首輔顧秉謙太宰李宗延科道李恒  
茂石三畏諸請託書函璫皆忌之及欽隣遷太常寺少  
卿遂曠所善彈劾削籍歸崇禎初引用直臣起南京府  
丞庚午南闈諸弊肅清晉通政使司事關民隱必急白  
之時有山東狂生叩闈疏事云臨清宜築城以遏流氛

左通政寢不以聞及當事失守被逮撫按賜死狂生復  
叅論阻隔波及右通政葛紀瞻欽隣查案牘爲昭雪得  
放還遷順天府尹晉戶部右侍郎旋轉左時度支仰屋  
增派二十八萬之額興欽隣馳書撫藩囑其搏節以固  
根本兵部尚書楊嗣昌奪情守制少詹事黃道周叅糾  
之忤旨下獄欽隣與范景文合疏論救坐罰俸陞南京  
右都御史掌院事嚴飭諸御史勿依勢作威旁侵郡國  
權會廷推吏部尚書列名上帝曰冢宰非莊某不可寬

蔡莊氏  
家傳

明列傳十一

蔡侃

楊瞿崧

林欲楫

林一柱

洪啓初

莊奇顯

林鈺

莊際昌

劉鱗長

曾化龍

蘇兆先

蔣德璟

林孕昌

蔡侃字明標號景運又號侗凡晉江人萬歷丙午舉人榜  
姓莊復本姓丁未聯捷進士授戶部主事歷員外郎中  
督理天津草場恪慎廉幹軍需以給遷撫州守耿介自  
持丁外艱起補淮安郡江南解部糧銀向由淮轉兌清  
例剔弊以卓異晉督學粵東崇經黜浮屏絕干瀆士風  
丕變閩撫蕭奕輔禮科辜朝薦廵按林銘球皆出其門  
轉贛州糧道德威昭著伏莽者懾服絕跡擢江西按察

藩爲鄉導設奇勦捕擒安僧及逆黨數十人上功晉左  
布政賜金幣崇禎四年滇土司普明升誘煽土酋日巴  
沙圻何如曲段之龍等據彌勒州三鄉堡攻阿迷侃饋  
運無悞五年右布政周士昌結營守禦爲賊所破陷阿  
迷攻臨安危如累卵撫按交薦特拜侃開府授節鉞時  
所在皆賊藪調兵措餉兩值其艱蠟丸告急日數十至  
侃上疏陳方畧訓練西南一帶土兵以計反閒賊黨何  
天衢自統官兵直逼賊壘有旨相機擒捕仍命節鉞制

建昌東川畢節等處地方兼督貴州兵餉臨安圍急賊  
以柳公車炮擊城侃密授守將方畧城中架木臺以火  
攻堵禦賊稍退夜以哨兵假乞丐入賊營燒毀柳公車  
乘火縱擊賊退守三鄉堡乘勝直搗巢穴擒梟長懿毋  
攝伊巴計等斬首數千普賊遠遁賊將何天衢斬其首  
來獻滇始安堵疏聞賜金幣蔭子侃復念嶠峨彌勒之  
閒無城終非長策疏請擇高埠築城三所設員置兵昆  
洱一帶永爲磐石軍中紀律嚴肅施以寬仁不終年奏

以母老乞終養歸兩由清風琴書



自娛無城闔之跡公府之步其天性然也未幾卒於家  
年六十六贈工部侍郎賜祭葬所著有滇輿詩草運篋

齋文集時文聯捷稿

通志參  
本傳

楊瞿唼字稚實號商澹晉江人萬歷乙酉舉人本名載萼  
獲雋後改今名丁未成進士授戶部主事越二年奉命  
權稅臨清關抗疏請蠲稅其畧謂清關爲神京咽喉清  
關不安則南北之脉絡絕而京師困今關稅益以廣安  
上取甚苛下匿甚巧挺而走險其何能擇使關臣工敲  
骨吸髓之術國家釀瓦解土崩之勢非計也孰若蠲之

爲便疏入不報瞿峽蒿目拊膺食寢俱廢復陳商民交困之本源新舊關制之利害列狀以聞纒纒數千言而卒歸罷貂璫廣安稅以復正額時比之賈長沙乙卯典試雲南英奇盡入彀中錄出紙貴陞郎中以按察司僉事督學粵東不攜眷不延友單車赴任至則首功令示畫一尊六經闢邪說正己率先持廉厲屬尤嚴察吏胥咸抱案辟易卽盛夏若負霜雪一切弊風倖竇洗剔靡遺至於力伸士氣曲全善類有含冤負抑者立前雪之

浮莫敢爲詭譎以干禁令呼爲粵東夫子二十年之內  
捷南宮者多其所取士兩薦卓異轉江西叅議造兵器  
買弓矢葺衙庭建新營皆自出俸金不動公帑擢按察  
司副使提督江西學政未幾告歸值援遼閩兵擾據龍  
津極力調停得免生變入崇安俟閩兵盡發乃歸杜門  
著述丹策自娛復至三山構藏書之室譚詩說經刊刷  
魯魚終日靡倦尤精於易當事屢薦剡辭不赴遂卒於  
三山其子昇櫬歸葬焉所著有疑藜易說四書疑說五

經疑筌栖霞疑測栖霞全集續集西方疑誣明文翼統

嶺南文獻

採林平庵撰志

林欲楫字仕濟號平庵晉江人南光祿寺卿欲棟弟萬歷癸卯解元丁未進士選庶吉士上國是人心一疏授編修假歸起充廷試掌卷官使封益藩還掌起居注戊午典浙江試假歸泰昌初起左中允天啓元年轉右諭德陞右庶子管理誥勅文擢少詹事晉禮部右侍郎時魏璫煽禍會水災欲楫陳修省數事觸璫忌遷南吏部璫

危欲楫不少動璫敗莊烈帝擢禮部尚書掌詹事府事  
朝議誅毛文龍力言不可與閣臣忤假歸三載召修實  
錄甲戌充殿試讀卷官教習館員引疾去戊寅起掌部  
職適武陵楊相嗣昌議增兵餉欲楫抗言三空四盡之  
秋不宜以窮民養驕兵尋具民窮兵譁一疏力指時弊  
又疏救左都劉宗周諸所披陳言無不盡差視鍾山陵  
寢還至天津前後連上十三疏以疾乞休唐王入閩名  
入閣尋歸卒著有易勺解學庸註補老子勺日記水雲

居詩草子華昌康熙舉人任常熟令

通志參李遜  
齋述志稿

林一柱字廷郢號璞所同安人啓元孫也萬歷丙午舉人  
庚戌進士初理揚州薦糾綜覈輿情允協治獄多平反  
不輕鞭扑歷署三篆清風颯然分校應天得士皆名流  
試湖廣御史疏奏切直請臨朝正紀綱有六逆五盡二  
反一順之目海內傳之熹宗初年疏敷上歷陳賣士餉  
卒名存實亡之弊雪幽忠明功罪至有世運當阨舉國  
若狂之句畱都東宮火請復建文廟號劾織造監李實

洪啓初字爾還號葆原南安人有聲于徙居晉江萬歷庚子舉順天鄉薦癸丑成進士授戶部主事出權許墅墅故有北關商困莫支啓初念一地兩關竭澤而漁甫受事卽疏請罷之諸商懼忭舟蔽江而下羨金至萬餘悉籍上內府戊午典試雲南所取士如雷躍龍戈允禮陳奇猷李大受廖大亨皆一時名士滇苦貢金飛輓釋騷商越地而採買官設處而邗移至盤河瘴癘中流而斃者比比啓初復疏列諸苦得旨蠲免著爲令調兵部郎

時東事失利啓初簡武弁選伍長清占役嚴出入雖輦  
轂之下法在必行丁內艱歸遂絕意仕進與友蘇庚新  
弟啓避剖析先儒語錄諸書方應祥稱其被服恂雅造  
次於是端居湛思雲停淵著故心靡不肖於理而腕靡  
不肖其心吳默亦云四聖有苗裔洛閩有功臣所著有

四書翼箋易經管見行於世

南安志

莊奇顯字允元號九微晉江人雷州守敏元孫年十九舉  
萬歷丙午鄉薦二十六癸丑成進士殿試第二人授編



歸家遍走山麓爲父求窀穸弗獲而痰濕中於是庚申  
赴京補南國子監司業年三十五卒臨歿作絕命詞謂  
非求生求見老母一日非憾死憾虛父母此生求者空  
求憾者永憾不忠不孝誰結吾局讀之人人嗚咽聞遼  
東事敗猶撫床扼腕謂不得馬革爲殉空斃牖下不勝  
恨恨奇顯孝友天植居恒恂飭與人交則開會見膽心  
貫金石不永其年時哀惜之所著有通鑑刪性理刪尚  
書指南行世其指南一書門人黃矩孕衍之爲便覽

通志

叅閩書

克薪堂文集

林鈇字實甫同安人龍溪籍萬歷壬子舉人丙辰進士殿  
試一甲第三人授翰林院編修歷國子監司業遷祭酒  
監有銅鼎銅缸爲臨雍會食及貯水備火之器魏璫欲  
假鑄錢鈇持不與時璫擅權烜赫立祠幾遍天下一日  
諸生執呈至鈇問云何對曰魏公功德巍巍宜立像太  
學請定判鈇曰諸生宜熟思之孔聖嚴師也禮有人主  
北面之尊魏人臣也若並列座他日皇上入學謁奠君

兼侍讀學士七年以枚卜召對陳用人理財靖寇寧邊  
四策即日拜東閣大學士入閣辦事時帝方疾黨人以  
鈇誠慤不立門戶特加眷顧首輔忌之困以煩劇遂以  
勞疾卒於官謚文穆鈇冲淡和平廉介自守鄭芝龍受  
撫奉千金爲壽卻之復其書曰成人之美君子也因之  
以爲利非君子也芝龍亦爲歎服

通志叅同安  
志漳州府志

莊際昌字景說號羨若晉江人曾祖用賓夢張襄惠來謁  
而際昌生因名夢岳以試更今名萬歷乙卯由永春庠

鄉薦第九名已未舉進士會試殿試皆第一以對策訛  
一字爲忌者所摘不受職而歸天啓元年補授翰林院  
修撰召修國史癸亥命經筵展書直起居注編輯六曹  
章奏光廟實錄成賜白金文綺加俸一級冊封趙藩王  
贈以珍寶辭曰王臣而彰寵賂如國法何且懸橐出盈  
橐入何面目見都人士也乙丑分校禮闈得士鄭子壽  
等十八人當試日試目遲未頒主衡令人登屋傳呼外  
簾官際昌持不可曰內外之防祖制也此防潰蔑不潰

獨馳慰勞或言且不測曰苟得借此以去吾願也其後  
題議詰勅璫兩爲所私以文請悉拒不應璫銜之丙寅  
皇子生賚詔往粵西歸會修三朝要典蹙然曰是固欲  
以國史爲刑書乎適敘遷官僚遂假中旨罷斥怡然爲  
終老計思興利除害爲政於鄉其冬海波不靖良家率  
遠竄乃約鄉鄰編伍守望宵柝相聞濱海以寧溜石陡  
門內蓄溪流外捍潮嚙四十二都田里所賴際昌爲諸  
生時曾與鄉先達合力築之至是歲久湮塞早澇俱病

則曰吾責也吾經始簡畧故至此遂大捐貲增舊規三  
之二里人永賴莊烈帝卽位魏瑄伏誅卽家起右諭德  
趣裝在道晉左春坊左庶子兼翰林院侍讀至京陞謝  
賜鏹楮珍膳授記注數召對秉筆記言五漏入侍率二  
鼓方罷扈從臨雍鶴立露臺病不假勞不休聲望日隆  
病卒卽中年五十有二次子希范以廷試在京理喪事  
列疏請卹帝聞心悼特贈詹事府詹事際昌爲詩文不  
經思索泚筆立就而天動輒隨宮鳴徵應性不喜摹帖

石爛如星錯其餘青烏青囊尅擇諸術靡不諳究俱以  
解悟得之生平坦夷峭直孝友切至好引掖後進以文  
謁者稍可取必爲延譽以成其名尤曠達自築邱于青  
陽山左麓題曰羨元真息鐫詩其旁曰百年忙半逝四  
大本歸虛亦詩識云著有羨若文集霞樓藏藁孫延裕

通志叅閩書補八閩

撥名記雲臺藏藁

劉鱗長字孟龍號乾所晉江人萬歷戊午己未聯捷進士  
授工部都水司主事接管皇極門灰石作差務白玉石

料鸞鳳柱等工內監揭開工數浮至三十萬金鱗長躬親督造極力爭執以六千金竣事計節省數十萬金觸總理工程內監馬誠之怒屢欲中傷司空王佐極力護之曰謗語卽汝薦章也曰推薦於總憲鄒元標冢卿張問達曰精詳縝密天部之選也差權荊州以羶地力辭同官咎其破格王司空曰羶處能恬冷處能耐大受器也先是遼事急都城有濬隍之役躬親催督分方計夫限深濶以定工價稽覈精嚴省費萬金同事以工倍價



西積土與牆平礙道路係李養德挑河時所堆催令搬  
運李懼不能辦則疏云乞委主政劉某協理不至冒費  
遂不辭共竣厥事司設監題造細車一百二十輛通叅  
馮時行題造五式奇車五十輛意在多領帑金分肥奉  
旨覆議俱委鱗長勘估裁減將半事遂寢值河北差缺  
慨然請行以外艱歸服除值魏璫煽焰委管街道廳屬  
南部採銅事有謀及者鱗長正色曰太祖定鼎豈不念  
此些少銅料寧聽其敝壞而爲盜有遂有銜而訴于璫

者街道到任之二日卽拆卸提督乾清宮王體乾之侵街房屋又清追五城官房戚畹及大璫所占據者變價近萬金維時總理大工仍係馬誠與魏璫依倚爲奸司屬至稱晚生私謁厚贈冀結其好惟鱗長不顧無何有估計保橋之議內監估價四十萬鱗長謂乘冬閒水涸冰堅從橋下填柳木夾以灰土夯築結實以便拽運其費不及保橋之一工部尚書黃克纘遂據以入街石五便疏奉旨如議及鱗長至蘆溝橋興工忽有旨降三級

起復原官陞員外司節慎庫一時臺省侵權擅行支放

力折具疏爲尚書張鳳翔勸止事發被累同逮詔獄謫  
常州府通判適孫慎行倡道東南鱗長師事焉署崑山  
令四閱月除隸役之虐民禁酗肆之惡習清漕糧之積  
弊父老爲塑像於候潮舊址祀之轉南戶部主事擢郎  
中旋視兩浙學政有公明之譽遷四川達昌叅議川東  
叅政張獻忠荼毒西蜀首議冒險恢復重夔等州縣唐  
王入閩擢太僕寺少卿兵部右侍郎加太子太保兵部

尚書兼東閣大學士

通志叅常州府志劉氏家傳

化龍字大雲號霖實晉江人萬歷戊午己未聯捷進士  
授臨川知縣有訟子不孝者令其父自為等行杖籌盡  
則止杖不數十父淚漉漉下匍匐爲子求悔乃令族長  
月具報曾否革行其子感孚卒以孝聞富人欲渝壻盟  
立其女庭中諭以義隨捐金令壻迎女歸直指謝文錦  
以治行第一薦時權璫用事密囑化龍往謁卽授銓諫  
笑置之外補寧國府同知遷南戶部員外改兵部丁內  
艱起補北兵部車駕司郎中督學粵東制府設關節納

竣事攝海道平劉香之亂上功第一移廣西叅議士民  
勒石紀績擢江南副使備兵常鎮輓漕者三賢勞懋著  
尋擢其省按察使有曾鐵面之稱出大辟二十餘人遷  
江西丁外艱歸結廬墓側若將終身以宿望卽家起僉  
都御史巡撫登萊時地方殘破奉旨蠲征三年而兵頻  
呼庚癸化龍練兵措餉請蠲請恤疏凡三十二上備載  
撫登疏草中會闖賊變作膠密土寇蠶起遂破高密化  
龍亟移鎮膠州登陴閱月日夜督戰擒僞官三十六員

時兵不滿百寇圍數重化龍曰事急矣憶予丁母憂時

海寇鍾斌薄城當道急閉關予以百口請立郊關視民

入城存活數萬天道有知遂棄骸骨膠城外即徑單騎

出闔傳呼曰都御史來即前執賊帥李好賢手諭以忠

義令殺賊自効好賢感泣還抵賊營擒渠魁張大雅等

十數人斬首千餘級膠圍解而高密城復散遣賊衆招

攜收流亡活民命甚衆以疾歸抵家病日劇庚寅五月

晦星隕是夜黃雲覆屋有二童子提燈入迎謂其子曰

蘇兆先字爾開號在蓼南安人萬歷己酉舉人己未進士  
授行人滿考擢刑科給事中首陳實求安攘一疏嗣有  
清仕路保泰寧一疏所彈駁皆借交植黨衆莫敢問者  
居庸原有軍站扣其月糧備貼過官往來諸費上乞甦  
邊因以固藩籬疏又有榆關馬弊乞設策稽查疏遷兵  
科左給事有速乘時修禦侮疏又有關門全備而實疎  
疏邊關報捷有兩捷盧有兩虞防勝艱於防敵疏時三  
殿鼎建有巡工之命視軍藏監局摘發奸胥追還上

供焰硝四萬三千餘兩夙蠹頓清陞俸一級賜白金文  
綺擢吏科都給事加太常寺少卿特薦王西臺余職方  
復其官後各爲名臣以忤逆璫歸崇禎辛未卒于家贈

太常寺正卿

康熙癸丑未成  
志稿參南安志

蔣德璟字中葆號八公又號若柳晉江人江西副使光彥  
子萬歷己酉舉人天啓壬戌進士選庶吉士除編修當  
館試時魏闡薰灼不入其樊諸璫幾欲中以危法與文  
震孟俱罷及崇禎十一年起原官歷官少詹事痛朝事



撤內操核要典諸大政皆關係國計侃侃名言久之擢  
禮部右侍郎時議限民田德璟言民田不可奪而足食  
莫如貴粟宜聽民墾田常平義倉悉輸本色時不能用  
楊嗣昌卒於軍德璟議曰嗣昌倡議加剿餉練餉致天  
下民窮羣爲盜又匿失事飾首功宜按仇鸞故事追正  
其罪不從薦原侍郎陳子壯顧錫疇原祭酒倪元璐文  
安之并乞寬謫戍臣黃道周旋皆錄用德璟博聞強識  
熟歷代典章及明朝掌故九邊阨塞河漕屯牧鹽筴水

利歷律刑法莫不究其利弊文章敏捷一日應二十餘  
詰勅見者歎異十五年六月廷推閣臣首德璟召對言  
邊臣須久任薊督半載更五人事將益廢帝曰不稱當  
更對曰與其更於後曷若慎於初帝問天變何由弭對  
曰拯百姓卽弭天變近加遼餉千餘萬練餉七百萬民  
何以堪祖制三協止一督一撫一總兵今增二督三撫  
六總兵又設副將以下數十人權不統一何由制勝帝  
領之首輔周廷儒亦薦德璟可大用遂擢德璟與黃景

周名用劉宗周免罪德璟力爲多南樞臣請糧多濫覆  
言江南軍糧原有定額向以所解南糧一百二十萬養

二十萬之軍不患不足今軍不滿八萬而糧不敷必有  
改折那借情弊解臣不得不任其咎開封久被圍自請  
馳督諸將戰優詔不允明年進御覽備邊冊凡九邊十  
六鎮新舊兵食之數及屯鹽民運漕糧馬價悉詳焉已  
進諸邊撫賞冊及御覽簡明冊帝深嘉之諸邊兵馬報  
戶部者常浮兵部過半耗糧居多而屯田鹽引民運每

鎮至數十百萬一聽之邊臣而已天津海道輸薊遼歲  
米豆且至三百萬惟倉場督臣及天津撫臣自爲出入  
部中皆不問德璟語部臣宜合部運津運各邊民運屯  
鹽之數通爲計畫餉何憂不足而加派之餉皆可裁因  
復條十事以責部臣然卒不能盡釐也一日召對帝語  
及練兵德璟曰會與高皇帝教練軍士一以弓弩刀鎗  
行賞罰此練軍法高所總小旂補役以鎗勝負爲陞降  
官舍比試必騎射精嫻方許襲替此練將法豈至今方

餘萬今則遼餉練餉并舊餉計二千餘萬而兵反少於  
往時耗蠹如此國何以堪又言文皇設京衛七十二計  
軍四十萬畿內八府軍二十八萬又有中都大寧山東  
河南班軍十六萬春秋入京操演深得居重馭輕之勢  
今皆虛冒且自來征討皆用衛所官軍嘉靖末始募兵  
遂置軍不用至加派日增軍民兩困願憲章二祖修復  
舊制帝深然之不果行十七年戶部主事蔣臣請行鈔  
法言歲造三十萬貫一貫價一兩歲可得銀三千萬兩

侍郎王鰲永贊行之帝特設內寶鈔局晝夜督造募商發賣無一人應者德璟言民雖愚誰肯以一金買一紙帝不聽又因局官言責取桑穰二百萬斤於畿輔山東河南浙江德璟力爭帝畱其揭不下後竟獲免先以軍儲不足歲僉畿輔山東河南富戶給值令買米豆輸天津多至百萬民大擾德璟因召對面陳其害帝卽令擬諭罷之德璟退復上疏極言邊將士視米豆如泥沙止欲得銀何苦括內地膏血填塞上或謂名買一罷邊卒

務也賊蠱惑愚民皆指加派而加派之害莫甚召買臣  
安敢避禍不言帝深納之二月帝以賊勢漸逼令羣臣  
會議以二十一日奏聞都御史李邦華密疏云輔臣知  
而不敢言冀曰帝手其疏問何事陳演以少詹事項煜  
東宮南遷議對帝取視默然德璟亦力贊帝不荅給事  
中光時亨追論練餉殃民之害德璟擬旨向來聚斂小  
人倡爲練餉致民窮禍結悞國良深帝不悅詰曰聚斂  
小人誰也德璟不敢斥嗣昌以故尚書李待問對帝曰

朕非聚斂但欲練兵耳德璟曰陛下豈肯聚斂然既有舊餉五百萬新餉九百餘萬復增練餉七百三十萬部臣實難辭責且所練兵馬安在薊督練四萬五千今止二萬五千保督練三萬今止二千五百保鎮練一萬今止二百若山永兵七萬八千薊密兵十萬昌平兵四萬宣大山西及陝西三邊各二十萬一經抽練原額兵馬俱不問并所抽亦未練徒增七百餘萬餉耳民安得不困帝曰今已并三餉爲一何必多言德璟曰戶部雖并



意稍解德璟退又言臣因近日邊臣每言兵馬皆以抽  
練之說抵塞明旨而全鎮新舊兵馬槩不言及是因有  
練餉而兵馬反少也臣私心恨之且近日有司每借練  
餉名追比如火致元元困苦遇賊輒迎甚者未見賊先  
迎雖三餉並急而練餉尤甚臣又私心痛之蓋至外無  
兵內無民且并無餉故推咎倡議之人愚戇罪當萬死  
因引罪出直帝雖慰畱旋罷練餉而德璟竟以三月二  
日去位給事中汪惟效檢討傅鼎銓等交章乞畱魏藻

德亦具疏懇請皆不允德璟聞山西陷未敢行及知廷臣留已卽辭朝歸嗣都城陷福王立於南京召入閣自陳三罪固辭明年六月唐王立於福州與何吾騶黃景昉並名又明年以足疾辭歸九月唐王敗德璟涕泣不

食卒於家所著有敬日草詩文集

通志參明史藁

林孕昌字爲馨號素菴晉江人萬歷乙卯舉人壬戌進士

授南京戶部廣東司主事專管文武各官俸鹽及淮浙長蘆山東福建各鹽引用印舊時鹽倉廢墜食鹽旣足

鹽後三殿工與搜括變價助費猶得四千金是時伯祖  
學曾爲南通政追隨兩載手抄薛文清王文成語錄及  
先儒格言相勉因悟濂洛關閩之旨調南兵部職方司  
主事勤操閱嚴夜巡兵將畏憚爲大司馬陳道亨所信  
服有標營衛總爲兵扯辱控之少司馬岳公責兵謝之  
旣而兵告衛總尅剝軍糧岳又欲處衛總孕昌謂衛總  
尅剝當以官評劾之不當以仇口處之名分者上下所  
以相維若兵丁訕上得志異日何以約束岳公不能奪  
前職方將各營選鋒召入標營營房窄不能容兵幾鼓

譟大司馬患之孕昌曰易處也每日嚴操練賞其技藝  
精者汰其老弱者及歲暮汰將千人人莫知者南營兵  
多占役冒破前職方陞任時吏書丐給腰牌三四十名  
次月造冊領糧孕昌曰奈何以詭名歲糜朝廷五六百  
金悉勾去之吏書復求少司馬批呈至孕昌知各兵皆  
頂替令舉大石不能者責之於是吏書稍斂戢點操犒  
賞出自地租而營官辦席浩費班皂復多需索孕昌自  
發廚辦席卽以其餘賞班皂營官不費一錢亦不得藉

病日侍湯藥籲天請代及沒哀毀踰禮是年九月已調南吏部考功司守制食貧爲父卜吉兆襄祖母葬事服闋催檄疊至崇禎元年始入京補北吏部稽勳主事調驗封掌司印時崔魏敗後各官慘死者子孫陳乞立爲題覆予贈蔭又題請願憲成馮從吾等各應加贈蔭子以風勵理學節義之臣調考功主事掌司印上吏途混雜宜清糾劾不職二疏調文選司題覆憲臣曹于汴薦舉理學周汝登請加尚書銜有司歲時存問疏末復請

直省公舉學業充茂一二人以風勵末俗卽山林隱逸  
有如吳與弼陳獻章者亦許薦舉以需聘名立鑽刺簿  
修銓曹儀注轉左司定吏途月選次序上推枚卜點用  
疏以成基命等進陞文選司員外郎掌銓事酌定舉貢  
官生論年取選屆選期放籤填簿俱司官經手吏無叢  
奸考舉貢監粟各官如闈中例司務收卷每十卷一束  
送公會廳分與同官各籤印記某卷係某官較閱關防  
嚴密是夕當堂出榜衆服其公明有奸棍鄧宗奎詐送

拘問搜出假圖書十四方並通判知縣提舉歲貢典史  
等契約六張皆一二千金不等閱對選簿俱列首名知  
係吏書串同作弊立上神奸捏造私書疏叅送刑部自  
此大選急選皆協羣望擢稽勳司郎中給假焚黃省親  
太宰王公嶺看語畧云本官以命世之才富典銓之任  
整暇敏練簡要清通執法如山真是吏從冰上立居心  
似水果然人在鏡中行蓋實錄也出京行李蕭然以小  
車曳出中宮驚曰吏部行李乃如此耶悉放出勿問至

家襄父葬事築筍江在茲堂舟峯雷荇亭舟峯左有林  
洞宋林蘊林藻讀書處也重闢之和宋劉屏山謁舟峯  
詩鐫於石明年癸酉開講於在茲堂與布衣黃文韶倡  
明旦氣之學從遊者日衆秋與黃景昉謝元珽同建禩  
雲亭于南臺冬卜宅栖綠園越甲戌復建講壇時蔣德  
璟假歸相與發明旦氣門徒益廣兵備會櫻太守樊維  
城邑令戈簡俱集聽講會公扁曰任仁書院內爲出雲  
堂正學堂樊公立碑記慕道來學者屢滿每月兩期俱



峯書院聽講郡紳士畢集孕昌與曾櫻黃文韶各出講  
章越日張應星以上問錄相質孕昌以問問錄答之丙  
子丁祖父憂是秋三子逢泰舉于鄉同社多中式解元  
亦出社中冬黃道周過泉復與曾櫻及廵道陸卿正至  
一峯祠聽講厥後當道俱先後入社筍堤鼓吹理學稱  
盛事丁丑與蔣德璟重建西洞天偕樂亭于清源爲文  
以記是年起補吏部驗封司郎中戊寅春入都赴任見  
司官出入皆由角門與同官議復舊例堂摺官不可叱

之曰我前歷四司俱走中門汝手持儀注乃我所較訂  
刊刻者奈何執近日委靡之習太宰商周祚聞之亟請  
中門進一時肅然是夏題覆何喬遠應加謚蔭不報雲  
南上司祿洪子姪爭襲撫按議四分其地各管夷日疏  
駁謂倫序未明國憲未伸應令勘定確議寧波劉伯洲  
原任江西副使百歲人瑞請改太僕卿京銜仍從三品  
散官以示優異董其昌子祖源承蔭移付選司改注選  
簿麗江府世襲土知府木懿貢方物馬疋乞加銜議加

部謂兩者皆不應襲孕曰愕然曰文成先生可使絕祀乎細按宗譜先達爲承勦之子既有可疑先通爲文成之孫更無異說吾儕從其所信毋從其所疑文成九原亦當首肯而數十年葛藤永斷矣於是議遂定南京刑部查叅僞吏周廷濟等二百六十七人其中真僞相兼乎昌按名清查或還原役或以應得罪名准其叅歷俟役滿覆覈其作弊者從重治罪無知受欺騙陷誣者准納贖助軍需行提未到一百九十一人嚴督原籍提解

一時人心悅服兵部尚書張鶴鳴流寇破穎禦賊殉難  
昌平副使藥濟衆亦山東禦寇陣亡爲請卹典後蔭以  
慰忠魂各王府選婚封誥題奏向皆寢閣孕昌稽舊案  
盡數彙題計題王府輔國奉國將軍中尉等及世子選  
婚郡君縣君儀賓等選題等誥命二百六十五道又題  
文武各官誥命贈蔭共四百餘土官承襲散官題授積  
不盡覆無畱牘明年己卯擢文選郎中上疏爲吏治當  
俱弛之後銓政有更新之期謹循職掌用剖愚忠以祈

剔不必襲陳遂以極力振剔四字額於選司內堂時部尚書缺帝慎重銓臣屢推不允孕昌呈堂於疏末開莊欽隣李待問張慎言張鏡心四人帝以欽隣補授而欽隣竟以過家省覲遲赴被譴臺省條陳銓政紛紛擇其有關治理者爲之題復吏胥故有頂金因知州郭正中條議覆疏謂欲革頂金在除缺主欲除缺主在汰冗役遇吏書缺卽將直省送到者考補不許再索頂金吏弊以除有同年李可植久淹縣令陞以南戶部主事惜薪

司太監馬姓移部稱可植欠絹銀千餘兩鑽營求陞該  
司獨不見韓文鏡事乎文鏡以揚州府陞副使因欠絹  
被叅提問選司衛先範亦以此降三級調外者朝中咸  
爲可植及孕昌危懼孕昌不爲動回文云本部照俸推  
陞不知餘杭令有欠絹銀之事從來戶工二部各官有  
叅罰必移咨本部停陞二部並未移會本部何從知之  
今將可植文憑扣留仍移浙江撫按察本官絹銀解完  
方許領憑赴任則兩無碍矣馬璫大喜謂銓部眞解事

王德化拿假官三人司屬震慄孕昌曰易事耳查三員履歷如非三考當檢舉疏叅書辦如無錯當叅東廠後廠知之移文取履歷送還三官而叅誣首駱姓反坐用庫科向有過缺之弊孕昌於各省進表官冊查其到任日期密造底冊存查遇書吏送推陞冊詰以某官俸最深何故不開則大驚於是積年之缺盡數開陞選者懽騰復疏奏爲人才匱詘已甚銓地啓事綦窮乞勅廷臣各舉所知靡吝臣部核用以信明詔以濟時艱事力陳

四竭三碍不下千三百言拂政府意票擬云選司職在用人廷臣薦舉多濫內外大小員缺林孕昌同該堂官虛公甄別實擇堪任的詳開履歷請旨點用不許借題徇私致開序密具帶降陞遷仍遵旨行於是楊嗣昌薛國觀百計媒孽四題覆以知府職銜管常鎮道事陳瑄題陞通州監軍公事范志懋張平及陞太僕寺丞孫晉屢經票駁遵旨疏辨甚明而楊嗣昌復以孕昌覆其所奏選人金鏡五款無一依行怒益甚竟以強辯下獄滿百



餘萬今則遼餉練餉并舊餉計二千餘萬而兵反少於  
往時耗蠹如此國何以堪又言文皇設京衛七十二計  
軍四十萬畿內八府軍二十八萬又有中都大寧山東  
河南班軍十六萬春秋入京操演深得若重馭輕之勢  
今皆虛冒且自來征討皆用衛所官軍嘉靖末始募兵  
遂置軍不用至加派日增軍民兩困願憲章二祖修復  
舊制帝深然之不果行十七年戶部主事蔣臣請行鈔  
法言歲造三十萬貫一貫價一兩歲可得銀三千萬兩

侍郎王鰲永贊行之帝特設內寶鈔局晝夜督造募商發賣無一人應者德璟言民雖愚誰肯以一金買一紙帝不聽又因局官言責取桑穰二百萬斤於畿輔山東河南浙江德璟力爭帝畱其揭不下後竟獲免先以軍儲不足歲僉畿輔山東河南富戶給值令買米豆輸天津多至百萬民大擾德璟因召對面陳其害帝卽令擬諭罷之德璟退復上疏極言邊將士視米豆如泥沙止欲得銀何苦括內地膏血填塞上或謂名買一罷邊卒

與父合厝四月八日負土成有元雁飛鳴之異因名曰雁山已復推太常寺正卿堅辭不出 大清兵至孕昌

廬墓雁山云秋海師迫城城中苛嚴束濕偕諸老寓崇福寺三十三日作子規三鳴秋興七首以自嘲戊子海師復至當事苛峻益甚與諸老寓東門又三十三日作五憶歌庚寅與兵備道黃澍談詩有八轆章禱齋雜詠栖霞倡和是秋太守建宏文社延孕昌主盟課藝評選文教大興辛卯重修西洞天置福田爲清源歲時香火

又於半嶺巖葺不易亭門人洪承峻扁而記之是春諸  
弟子鑄孕昌石像于八仙閣值誕晨及門百餘人執經  
開講第一山爲壽太守高聯興送正學扁至門人黏本  
盛王命岳爲記壬辰開講栖綠之潔身堂復擣論語分  
經書藝從者益廣癸巳直指王應元疏薦奉

旨原職考核酌用

具

呈懇辭方伯周亮工巡撫佟國器爲題請予告越丙申  
元旦筮得小過之豫兢兢以過防爲念是春陰雨偶跌

就蛻巖祈雨三禱皆應是冬十月卒於家年六十三孕  
昌自通籍至林居未嘗求田問舍膝有十子家無擔石  
易簣時幾不能斂筭中僅遺筆五矢墨二面履一隻戊  
戌郡紳士公舉特祠按院成性批云林宦羽儀當代啓  
迪後人探孔孟之淵源接閩之遺緒旣孚輿論宜亟  
薦馨已亥春迎祀于晉江學左之旦氣堂爲講學舊處  
所著有繭草經史釋義論語釋義周易口占旦氣語錄  
內外篇旦氣箴泉山小志戊巳自鏡錄續小學易史廣

占易史象解春秋易義春秋總論三禮約弟經續尚書  
續二百篇銓曹奏議在茲堂會語荀堤集雁山集百夢  
草等書于逢泰崇禎丙子舉人歷任隴西三水知縣逢

濟康熙甲子舉人懷遠知縣

通志參素  
蒼年譜

人物列傳

明列傳十二

王觀光

王忠孝

陳洪謚

莊龍獻

蔡鼎

李焜

張潛夫

盧若騰

李光龍

王觀光字子開一字于國號存儒晉江人萬歷壬子舉人

王天啓乙丑進士授舒城令富戶多飛米脫役累貧民至  
則總計米額設法派貼而役始均直指按臨奸徒自充  
訪犯捏富民爲被害嚇脅之令賠贓因以爲利觀光詳  
覈真犯使服辜坐贓寧少無濫有屠者謀殺其伴屍刀  
俱投潭中仍自控告亟馳視之蛙跳蓮葉哀鳴不已使  
投水驗之屠刀在焉遂抵命一妖男子以婦貌偷入富  
貴家事發立斃之不使再出一言邑人稱厚有兄弟訟  
數年名至庭中以至情感動之名涕泣悔罪去計竣遷



常州知府有織造歲例八千金革去之又內官多駁緞  
絹勒機戶造換破費累數十萬通詳奏准貼價得免再  
造四府機戶皆援爲例宜興魯較肆爲亂首燬屋剗墳  
幾成大變以計擒之餘黨遂戢郡有權相薰炎灼天泣  
任八月不通一刺而紳士持論多異同不無掣肘遂引  
疾歸以少司農莊欽隣薦起補荊州知府惠藩桐封在  
焉藩府有紫金山承奉怙勢橫甚拘士民數千人幽其  
中下車憇者盈數篋觀光謂爭之不如化之密緘送承

奉大驚愧夜出數千人府前後歡聲如沸潞藩與惠藩  
疏爭墾田數年不能決爲調之得平而止荆故流寇出  
入處也沙市在城外十里許衝要繁華賊垂涎焉殘破  
者三郡有商稅例歸太守推與侔分季掌焉遂將所得  
稅銀建築關城延袤三十里沙草二市賴爲藩屏郡人  
國子祭酒文定之爲文記之宋銀山掘地得金千八百  
兩以千金助邊八百金充城費建敵樓額曰天助自爲  
文記焉惠藩表上其事得旨加級優擢時流氛日熾屢

闖賊奸細術能呼風喚雨來謁倨甚稔其姦令之演武  
場自獻八陣圖密授計破之慙阻遁去餘黨數千人尚  
謀爲亂設備殲焉楊閣部督兵駐荆襄閒民苦饋餉詳  
令其兵自饋楊心銜之遂中以計與去之日士民攀轅  
臥轍至闕於帥院之門號聲振天惠藩特疏保留楊亦  
心悔上疏乞召還未抵家而旨下乃回任是時寇益猖  
獩闖兵嘗以三百人混入荆城託買棉窺虛實觀光盤  
詰素嚴悉爲鄉勇擒獻徐諭之曰汝等旣爲西營兵皆  
朝廷赤子忍令獨寒第歸語而主無生事開釁遂發棉

賣之賊亦心驚過當陽距荆八十里不敢窺半武焉自  
是登陴設防無虛日除夕猶在城上積勞成病乃乞休  
荆人建祠塑像崇奉稱爲小關公蓋因其守荆多惠愛  
而名與關公同音也唐王時起戶部右侍郎兼吏禮兵  
三部事未幾歸觀光聰穎絕人過目成誦歷久不忘爲  
文自成一家與人落落不苟合居家孝友睦族及林下  
優游躬自灌園奴耕婢織足不入城市惟與里老談說  
農桑教以禮義其家訓曰文章須性靈流出品地由淡

雲南通志  
公撰志

王忠孝字長孺號愧兩惠安人性介慎不輕取與天啓丁卯舉人崇禎戊辰進士授戶部主事時北事亟朝議欲盡輸津通外儲以實京師忠孝督運大通橋設法催儻日運米三萬石屢奉溫旨大司農重之一日訶事者獲盜糧及窩主以聞有旨經管官所司何事大司農怵忠孝曰明主可以理奪疏謂臣所司者運耳運之不前臣之罪也刺姦緝盜自有司存米在號房運官自應炤管臣不能分身代守亦不能分身緝捕也帝復是之會薊

督貽書戶部謂邊儲重任安得廉慎明決可共事者大  
司農曰此無逾王士事矣遂題督薊儲是時不右文治  
新竒督內璫薊監視太監鄧希詔張甚數以難事相窘  
忠孝不爲動希詔欲自置兵設餉就庾索耗羨忠孝曰  
升斗皆官安得耗羨希詔曰餉司能保無額外之升斗  
耶忠孝正色曰吾戴吾頭來也豈以頭易升斗哉希詔  
語塞希詔初至薊督往拜坐上座而督署爲徐中山  
王舊涖上有高帝勅諭薊督謀相見禮忠孝曰鄧監視

之者正旦朝賀希詔爭班次語侵薊督忠孝徐折之益  
銜刺骨遂撫拾其未兌濕米疏上御覽大相希璫意且  
以通運時爲其媼請越幫先兌不許爲憾擬旨云錦衣  
緹騎逮治緹帥王世盛素聞忠孝名乃擇大校手之愿  
者屬令詳詞以報校至薊居外數日所見皆憤璫虐而  
譽忠孝不容口入見忠孝拜命畢曰吾遲諸君久矣第  
主人不能具一餐奈何校曰官一泓秋水下走輩寧非  
人耶乃盡去其銀鐙得具輿從以行故事緹騎所至不  
厭則楚毒隨之忠孝索署中不能滿十金校曰以代吾

輩彙餽可也終不受一錢京師相傳以爲怪事入獄置  
對忠孝抗辨無撓部堂薊督各疏言其寃希詔迨乃行  
金於部之胥吏別求可羅織此獄者皆曰王公所行事  
鐵甕城也難攻矣一老猾吏大笑曰與我多金吾法能  
使彼自入甕中何慮不承倉有腳價相沿爲餉司公費  
薊儲三百萬腳價幾千兩夫十兩以上皆賊况千百乎  
彼升合不染此鑑萬無存畱足以死矣希詔大喜補疏  
如猾吏教及鞠忠孝曰腳價以無開銷然銖兩皆朝廷



旨切責鑄二秩都察院王志道疏言王某被逮之日不能具一餐一饌上怒明日召對面質曰王某不能具一餐一饌汝何得知志道曰內外臣僚皆知之京師百萬口能言之不獨臣也上意稍解遂得改刑部繫擬戍其明年希詔所爲不法事驗皆有據內大璫恐爲外廷所藉口叅逮詔獄論斬而忠孝亦遂登啓事然終不肯以赫號入帝城事竟寢甲申聞變哭嘔血福王監國金陵史可法特疏首舉是時諸廢謫皆驟陟清華勸駕旁午

忠孝曰區區江左而營綜如此今文與文貳武與武構  
吾將爲陸大夫乎爲李侍郎乎終以疾請丙戌丁亥之

歲入海不返卒于臺灣

通志參  
臺灣志

陳洪謚字龍甫號默庵晉江人宋與桂之裔少聰穎試諸  
生累第一天啓丁卯舉人崇禎辛未進士授南戶部主

事管北新關常例悉除去掌南京水兌衛軍仰給漕糧

剔弊稽實塞出入影耗之竇商民祠而祝焉遷員外郎

擢守蘇州蘇賦幾當天下半積逋稠疊考成嚴切鐫級

至盡成勸其亟催科洪謚笑曰吾寧以民命博一官哉

信服或不欲終訟輒銷牒遣之歲飢穀湧貴羣不逞聚  
黨入豪家劫粟密捕渠魁按治發積穀勸富家出粟價  
平亂息於是大興工役修學宮繕城垣浚濠河日役千  
餘人使少壯者得藉以食其老弱婦女不能力作者設  
粥食之民賴以生吳江民變奉臺檄單舸赴之民以太  
守乘危爭駕數百艘爲衛皆遣還獨往開諭衆卽羅拜  
謂陳府公來活我立散去流賊薄安慶督府議撤閩門  
萬家爲防禦計洪謐曰撤恐擾民賊必無渡江越南京

趨蘇州之理脫有不虞請任其咎卒不奉檄言果驗人服其鎮定嘗閱舊牘見倡毀九學書院爲闔祠者擬戍曰罪有大於此予趣具獄論死奸民張漢儒訐奏

瞿式耜章下三府會鞫同事難之洪謐曰豈有奸人上書而太守附會者竟定誣告罪獨署名以上得報可修復書院以訓諸生雖勾較煩劇必親往每試士絕竿牘自檢閱所摸索與外論不爽銖毫恒言天下亂皆吏不恤民所致故守蘇九載一以仁恕爲政扞災患勤撫

惟恐其去庚辰舉卓異第一癸未考績合洪謐無可舉者復注第一例當入覲逋課多民咸懼其獲嚴譴帝廉知有惠政紀名御屏及至闕遽遷登萊副使旋晉太僕寺少卿又議轉陞兵部右侍郎會京師已陷未及任唐王時以民望授兵部左侍郎改禮部乙酉秋與蔣德璟黃景昉黃道周同名拜文淵閣大學士以母老乞歸年六十九卒洪謐學行夙優方寵擢未及大用獨於部曹著績而其守蘇治行爲最與方岳貢齊名同祀蘇州名

官又與蘇州推官倪長珩並著廉名郡人為立雙清書

院素工詩其遊清源山詩云曉谷花耕深帶雨夜船漁

火靜通潮人競傳誦以為得眺遠之趣子俞侯孫元焜

元焜曾孫熙塙垣元孫國豪並登科

通志參江南通志蘇州名宦記

莊鼈獻字叔瞻號任公晉江人崇禎庚午辛未聯捷進士

授庶吉士改兵科給事中其冬上太平十二策首格君

心開言路終以折獄用刑謂中州為形勢之區今秦晉

蠢動以此為淵藪是必有跋扈之雄將以釀亂者及今

切皆極論東廠之害疏入謫浙江布政司照磨遂賦歸  
黃道周贈詩云當年稽首十二策我遠不及莊任公福  
王時起故官未幾卒所著有葵山文集

通志明  
史台參

蔡鼎字可挹號無能晉江人爲諸生研精易學多發前人  
所未發星緯諸書獨探其祕言屢奇驗以經世自任大  
書懸楣曰來師堂寓必來取法爲王者師之意客遊燕  
都談時事如列眉朝紳咸折節焉高陽孫承宗督師薊  
遼徵鼎爲山海關閣部參謀所至山川形勢隨時筆記

贊襄區畫數年安靜丙寅帝賜爲白衣叅軍丁卯上疏  
陳魏忠賢之奸觸怒潛避莊烈帝卽位命繪像訪求復  
原職辭不拜命帝稱爲蔡布衣賜茶丁丑歸戊寅見國  
患日深仗策叩闕與時朽鑿竟爲所抑激論一書觀者  
咋舌鼎曰我非時所能用亦非時所能殺所以爲此者  
將以明天下未嘗無人也自是屢揭送政府伏闕陳疏  
皆極論邊事時不能用乙酉唐王馳詔二聘拜左軍軍  
師值鄭芝龍跋扈退隱卓巖乙未仲秋晦日初出潔身



勞人住士今後歸去稱逸民矣卒年六十有八著有

蔡集解聞中曹學佺

梁谿曹荃雲閒陳子

龍同校訂刻之子龍序曰無能先生學本先聖識探象  
父其易蔡一書五十萬言閎深精確壯時曾居高陽帷  
幄棄襦南歸畱心著述先生之學在天人性命之際經  
濟文章直緒餘耳讀震艮漸歸妹諸解可以知其養讀  
蹇解損益諸解可以知其識而骨性堅凝天資篤摯壯  
不求仕貧不問資澹泊寧靜若將終身則得於易深也  
虞山蔣棻亦有序曰閩蔡無能慷慨負大志以澄清爲

已在精天官學又老于諸邊熟邊情審兵要嘗佐議樞  
府獻策金門能已見于天下而于易尤深憫斯道之久  
晦傷末學之多岐謂我不正其源流剖其離合無以闡  
聖緒詔來茲也窮日落月殫精畢慮彙成易蔡一書凡  
五十萬言其閒探天人之祕察陰陽之質發羲文周孔  
之微定卦象爻傳之次新解特出蘊義淵宏誠足補王  
輔嗣所未及而七十餘家之支言剿說直以選兵壓游  
兵以輕騎擊散騎矣遇國家大故建議剴切事後徵驗

偶拈云吾不得過計於茲遂絕筆世或以其推測不爽

比于識諱術數之學則失之矣

通志參經義  
考沈佺期傳

李焯字洪圖一字元馭號唐谷晉江人天啓辛酉舉人崇

禎甲戌進士殿試擬一甲一名進呈因首輔口讀如流

疑有私御定二甲一名授禮部祠祭司主事司員多缺

兼攝數篆題覆六百餘疏皆奉俞旨丙子典試粵東力

變古雅得士皆名宿擢兵科給事中戊寅流寇方熾名

對陳新來之寇宜堅堵南下之寇宜急剿莊烈帝首肯

之寇震鳳陵帝詢禮臣所宜行驚愕莫對煇引嘉靖間  
太廟燔報書宗室頒詔更始故事得允行他如鳳陽建  
城聖諭謁陵伊府進真容唐庶人爭藩禮齊駙馬供神  
光二廟皆歷敘其艱難重大違拂齟齬之故或畱中或  
報聞俱有回天力復疏陳邊畧謂寇有三窟西北在平  
鳳之山谷西南在鄖襄東南在英霍乞專責諸臣各扼  
要地破其盤踞絕其狂奔戰爲用守爲體能守而後能  
戰差封益藩還轉禮科悼靈王薨加封慈應真君並命  
禮臣議皇太后莊妃懿妃道號煇言后妃奉先殿播之

史冊不可崇邪教以亂徽稱且具錄太祖資世通訓大  
義以進督餉江西再任粵東至武林病卒焜末第時嘗  
鳩衆增築漕石陡門爲三坎利倍于昔鄉人頌之

明史  
叅家

傳水利  
功德錄

張潛夫字爲龍號確菴晚更號遜生晉江人瑞圖子崇禎

癸酉第一名舉人庚辰進士選庶常授檢討以父疾假  
歸連丁二艱服除值鼎革不仕當事者亦不之強家居  
以經史自娛手自抄謄筆法遒勁直追鍾王或時與方  
外遊取杜工部且將棋度日應用酒爲年之句自題齋

頭其恬澹如此年七十五卒所著有尚書提旨十七史

撮要性理彙纂

評點東坡集

通志參家乘

盧若騰字牧州同安人崇禎丙子舉人庚辰進士御試名

對稱旨授兵部主事時閣臣楊嗣昌督師湖廣好作佛

事祈福若騰疏叅嗣昌不能討賊只圖佞佛帝以新進

小臣妄詆元輔嚴旨切責時論壯之遷寧波巡海道僉

一事疏糾權璫田國興攬帶貨船濫用人夫辱州縣阻閹

口有旨名國興回論如法居官潔已惠民剔奸弊抑勢

指顧旬日間兇渠擒首聞井邑然亦有功於德於治

祠之歷久不廢歷鳳陽巡撫甲申變後與癸未進士沈

佺期許吉燦等同渡海隱於臺灣勵節終身卒年六十

六所著有方輿圖考浯洲節烈傳及詩稿文集

通志象  
浙江通

志同  
安志

李光龍字蟠卿號在明安溪人誕生時祖夢杜工部來訪

覺值光龍生七歲父命對乘桴浮於海光龍應聲束帶

立於朝年十三從族叔偕芳受易時里中多治尚書惟

偕芳素治易精熟光龍年雖穉殊有悟稍長與叔鳳鳴

同學受業于孫伯紫每構義屈行輩自言稍長爲舉子業亦能帖括一二歸索家中遺書得馬班全集縱觀之玩味至忘寢食益厭時師訓誥學遂上及六經旁及諸子下至宋諸儒近代諸名公俱欲究其指歸汰其緒論又言自戊午以後讀書仲悔兄齋中桃源陳子因公車歸必攜笈就焉三人相席相證者不斤斤舉業專以品行相勗旁及經濟深究性命壬午出揭潛銘重熙房薦於主司稱光龍易學純深備采作程會試過江上阻寇



白東谷允謙尤一見傾服是時光龍名重有速之應中  
祕之選者光龍愁然私謂薛師曰京師焚埃黥黥甄瓦  
咸碧卽不習五行傳而吉凶可知矣不廷試遂歸甲申  
後隱於山中日與宗黨親朋沈淪詩酒閒尋方外交戊  
巳閒里中大變光龍深心潛方委蛇而坐消之事平後  
人始推其安鄉里之功光龍生於郟城負郭窮巷屬家  
道中衰旋移故里稍長卽問家世之所以廢興狀因就  
外傳家貧素不事生產業浮沈諸生者最久然其才爲

國榦學足世儀郡邑大夫數式閭閻政嘗講切師友於  
同郡黃景昉林欲楫有往復載集中可考迨晚歲登第  
卽值國變曰吾年逾五倖一第而卒邁此天教吾隱也  
於是號餘隱焉平生著作不甚篋藏諸子頗收十之三  
未刻目曰閩山集卒年七十五時康熙己巳年也宗中  
受業者曰燦兆慶皆稱高第焉

安溪志  
系閩山集家傳

國朝列傳一

楊旬瑛

林嗣環

陳寶鎰

陳允錫

富鴻基

○楊旬瑛字維六晉江人明大學士景辰子天啓丁卯舉人順治己丑進士選庶常擢爲御史巡按廣東時尚耿二藩擁重兵得便宜行事欲坐受使者拜旬瑛至一拱手遽登共座曰春秋王人雖微坐諸侯上况代天子巡狩乎二藩改容謝之有梗化者單車往諭卽就撫再按兩浙風裁益厲以終養乞歸卒於家富侍郎鴻基稱之曰吉甫雖美不如德裕之爲烈世謂知言焉

雍正舊稿

○林嗣環字起八號鐵崖由安溪徙晉江遂爲晉江人崇禎壬午舉人順治己丑進士累官廣東海南副使駐瓊州性耿介有風裁在任多惠政如禁錮婢禁投充禁株連禁民借營債粵人嘖嘖頌之先是賊首羅成基踞民田民代輸稅及賊平沒其產稅仍累民嗣環力請清覈以賊產入官餘還民瓊向有派役之例值者苦之爲力均偏累時有馬伽沙賈舶抵朱崖界上主帥利其重貨將執戮之嗣環曰吾以書生釋褐

芳服也攘功挑釁嗣環死不敢爲帥銜之究無以奪其  
議聽賈人歸國時尚耿二藩並集粵中無餉嗣環議兵  
屯種拂二藩意共嗾帥劾之被逮問慷慨力陳藩兵不  
法事由是調耿藩於閩嗣環落職寓西湖博學善屬文  
日徜徉歌嘯於湖山詩酒閒一時海內名流

朱竹垞宋荔裳鄒程邨王西樵輩爭相推重旣歿  
顧豹文同宗貞觀醪金葬之宣城施愚山嘗敘其湖舫  
集鐵崖奇人也爲文章光怪百出寧駭俗母猶人其礪  
砢鬱積不平之氣直欲排山裂石作霹靂聲卒客死於

湖上葬白沙泉石瓊人設主祀於包拯祠中著有鐵崖

文集詩集海漁編嶺南紀畧等書 林西仲題跋浙江廣東通志安溪志合參

○黃熙纘字愈惟號傲庵晉江安平人順治甲午舉人授

安慶推官剛方威重堅不可撼有大猾某竄籍通時貴

多奧援上官莫敢問熙纘曰此猾不鉅終害吾治設法

鉤斃之數月明允四達凡隣封覆盆皆持牒上號求質

於腕理於是平反獨多庚子分校得士有冰鑑之譽署

郡篆會海寇指金山而上瓜州鎮江失守艨艟數萬銜

尾被空一被會揚州而淮豫劫一被度宜歎而西江震

衆志危疑熙纘益招散亡之將醫臂折矢與誓厚撫奔卒日椎牛大饗教之衝伏作止如法有持偽檄至者立縛置獄中及賊至熙纘開門躍馬視鞭所指恣出斫礮之瞬息奔潰爭舟指掬闐然棄桅檣而遁值江寧亦戰勝賊退伏無所散落於桐潛閒百千爲隊犯黃荆笨一帶熙纘夜馳擊之俘獲無數僞總兵率賊衆數千歸命又擊降僞副將六人安慶以靖上功首薦適內差按陷城罪衆咸推熙纘受事後周廻細研微聞中夜有號呶聲益極力條別輕重得情奏上悉如議始賊之去也督

念陸梁將爲患遣兵戍安慶坐民居而噉之熙纘以流離初附不堪伍健兒抗議畢撤督撫不能難一日檄取潛江將某熙纘假稱閱兵單騎致之莫敢譁又一日檄取敗將十三人熙纘慮爲變給謂止召三人而隱其餘名令作管解而密報上官至皆就獄衆服其識在皖三年

聖祖追念其功曰黃熙纘功不在守崇明之下授三等阿達哈哈番世襲四次 召入爲刑科給事中轉禮科右給事



世祖章皇帝禱祠宮遺邸幼賦繡畢疏詞送歸隱逸

艱匄歸服闋晉京凡途中見聞無不援筆成藁為入告地而病漸劇卒於京年四十三得 賜祭熙纘博學工詩

其詩觸景揮寫無意求工輒臻神境所著有諫垣奏議

栖霞山記 通志叅富雲麓撰誌 江南通志高言集

○王命岳字伯容號恥古晉江人崇禎己卯舉人順治乙未進士選庶吉士未散館擢工科給事中

賜袍服給膳養歷戶兵二科所條奏甚多其大者如吏治樞政漕弊興屯清糧及閩省救災楚地協餉等疏皆精

詳剴切關軍國大計朝野傳誦

世祖幸南苑嘗對九卿稱道所奏及疏劾粵藩吏蒙

褒歎謂非王命岳莫敢言者辛丑

聖祖御極奉使粵東卻尚藩贈金與之抗禮還遷刑科都給  
事中會朝議欲裁天下教職抗疏力爭得不行嘗廷議  
大事與王大臣侃侃折辯無所回撓語聞

聖祖爲動容尋以議獄坐謫丁未旱災

詔求直言命岳自傷身在事外猶手疏地方利害具稿諷

蚤歲師事黃道周博學工文尤覃思易學著新卦册

天十二篇在諫垣時有營弁強買良家女以贈其帥主

王姓者誤送至命岳所詢得其實贖遣還家使粵時道

訪顏茂猷故居適其姪負營直逼取其孥以去為傾橐

贖之周亮工贈詩云生平動念皆君國半夜焚香聽鬼

神世以為知言著有恥躬堂文集二十卷學者稱恥古

先生子錫自拔貢建甯教授

雍正舊稿

○陳寶鑰字大萊號蓼厓晚更綠崖晉江人

入山浮海授徒談經十餘年闡明性理進退講

夙少所志 卷之四十五  
箋發先儒所未發督師李公奇其才畧薦授僉事備兵  
青齊輯兵安氏寬猛互濟舊有响馬爲患劉單刀劉雙  
刀尤劇哨捕得一賊甚雄偉特署爲材官令立功自効  
賊感激具言二劉某日當會龍泉寺中命中軍率標圍  
寺毀壁破柱得於泥佛腹中榜殺之地方以靖丁內艱  
奉

詔撫閩海布恩信陳禍福鮫蜃已有悔心爲耿精忠所誘  
中輟服闋補揚州分守道兼權鈔關嗣復主通省驛鹽

期推廟殺命涉姪爲媿者願其對木對之平明不害者  
數千人焚香羅拜有受誣在獄八年者訊其冤狀爲物

色劫金戕命之正犯起獲真贓而被誣者以脫清強占  
禁假銀驛鹽權關諸弊悉杜絕歡聲雷動秩滿擢貴州  
叅議督理糧儲苗夷散處巖谷屢肆侵掠寶鑰單車入  
寨諭以恩威皆投戈棄弩願爲良民會學使丁艱委主  
學政披沙檢金士頌公明其分守雖黔貴平而通省糧  
驛屯政咸屬焉所轄楚黔二十四衛雲南霑益一州欽  
崎鴛窄難於蜀道飭州縣募工伐石鑿徑造梁修棧道

拓而廣之行人如登衽席壬子提調秋闈二場各有施  
給衰老加以參藥比揭曉則入殼者皆向署督學時所  
鑿拔者也弔忠魂訪遺跡歸洪六生郭賢水何鏡予之  
骸葬於鄉土鄉人義之吳逆煽亂挾督撫司道而去人  
皆震懾莫敢斥其非寶鑰毅然力爭痛哭流涕時咸爲  
危以民望獲免乃退處取春秋四傳而斷解之以寓感  
憤已而被羈長沙復集歷代諸史縱橫袞貶闡幽抉奧  
於前明賢好實跡益審慎搜採脫險棲遲湖湘南北大

工左右著作稿率制刻于葉旣歸家布衣蔬食名其堂

曰綠野列書於左右口不絕吟手不停披篝燈丙夜有  
得卽隨書之與安溪李曰燥相友善常郵寄互相叅證  
年七十四卒所著有春秋遵懼編二十六卷綠野堂論  
史十卷詩集文集八卷四書經義共六卷

節家傳象李  
漁仲撰誌

○陳允錫字子帥號壘齋晉江人祖叔揆明萬歷己未以  
禮經貢官至興化教授父鳴鑾順治閒任海陽令時李  
成棟倡亂不污僞職允錫讀書過目成誦五經子史詩  
文靡不淹貫弱冠遊庠食餼名噪文壇順治乙未定遠  
大將軍帥師入閩奉

命舉人才允錫試一等授德化教諭督學孔公考教職首  
拔之薦疏有才華煥發品行端方筆有鸞螭守如冰玉  
之語改扶風縣丞時令不治事當事欲去之以允錫代  
允錫曰令雖才短而廉使某得實心佐之事可不廢咸  
嘉歎從之流寇掠邑令尉倉皇逃避允錫獨朗誦衙齋  
寇至問何以不去曰吾爲 朝廷命吏與城存亡去將何  
之寇奇而去事定衆欲以聞曰得不爲令尉地乎卒不  
自言丁內艱起補掖縣丞攝膠州事移進賢縣丞攝安



先事理兵惟長本藥房宜才私取而後分官轉所至稱  
其文名聘修志書如鳳翔府志江西通志皆出其手久  
任閒曹益肆力經史詩文以著述爲已任有十三經解  
二十一史緯諸子鈔古今詩刪古今文選疊齋集皆膾  
炙人口至史緯一書爲卷三百三十康熙辛丑大司寇  
靜海勵公廷儀進呈

聖祖仁皇帝御覽有當

聖意收藏祕府書益盛行海內推重無何遷平湖令泣任  
後剔漕弊革耗羨清獄理冤除奸舉廢盜賊止息案無

畱牘暮年乞休歸杜門不出子爲上海令迎養不就修  
族譜課諸孫左右圖書日與古人爲徒年八十四卒允  
錫篤於至性聞父在粵不屈隻身被羈航海赴難瀕死  
不避父得生還嫡母黃無出孝事過於所生友于二弟  
情均手足誼同師友爲弟立嗣嗣繼歿必盡其心幼姪  
飄泊展轉求歸教育成名溥宦三十載囊無私蓄惟買  
田百畝以充先祀耄年思親哭奠隕涕易簣之時猶朝  
服北面恭禱

聖安忠愛藹如子善任上海興寧二縣令系士芝康烈癸

已舉人長樂教諭陳氏家傳節畧

○富鴻基字磐伯號雲麓晉江人順治甲午舉人戊戌進士選庶常習滿音工清書巳亥

御試第一授編修分校禮闈陞侍講與修 玉牒假歸省

覲丁外艱服闋起原官遷侍讀陞侍讀學士丙午典順

天武鄉試纂修

世祖章皇帝實錄丁內艱服除遷內閣學士兼禮部侍郎充

日講官起居注纂修

太宗文皇帝實錄總裁甲寅耿鄭之亂竊踞閩中相國李光

身少府志 卷之四十五  
地時爲編修家居密疏陳賊可取狀請

王師由贛抵汀乘虛而入疏旣具而道梗不通遂以蠟爲  
丸置疏其中遣家人閉道微行經年乃達京師閣中以  
人自遠來虛實未知慮有變拒不納鴻基曰孤臣効忠  
出萬死爲 國家圖東南半壁計奈何坐失機宜吾當以  
全家百口保之卽日代奏

聖祖大喜出疏遍示滿漢諸大臣輒予施行丁巳

王師入閩 康親王先遣合旗護鴻基眷屬闔門安堵是

知貢舉鎖院積弊爲之一清以病假再疏陳請謂公署  
非養疴之地卿貳豈臥治之官蒙

俞旨病痊補用歸家十年卒年七十二

賜葬 諭祭鴻基持身嚴重力撓浮澆所行多酌古禮居  
喪獨闢浮屠少小時當明季文弊窮極神怪之餘首爲  
程朱經學錢王文法後習雖屢變然郡人士至今知正  
學而誦守者實鴻基倡之也性醇厚不輕論人是非至  
盈庭聚議則讜正不隨刑部尚書魏象樞每語人曰吾

於會議班中見其胸次洞洞無夾帶一物者惟雲麓先生而已里居有司未嘗得面同年友大司馬秀水杜臻奉

命過泉冒雨至門直入臥室迺得與語然終以病謝不報謁刺其潔謹自守類如此所著有日講四書十六卷詩

文集四卷藏於家子中琰

採李厚菴撰誌

國朝列傳二

李光地

李光坡

陳遷鶴

李鍾倫

施世綸

黃志璋

蔡仕舫

李鍾僑

李天寵

李清植

陳大玠

陳高翔

○李光地字晉卿號厚菴安溪人年四歲能以炭摹地上  
燈字影五歲入塾力學過人十四歲舉家陷賊挾以邀  
金欲殺者屢終不懼閒卽取書讀賊帥奇之其伯父日  
燦募死士襲破賊砦拔以歸父兆慶篤嗜正學以明季  
講師茂棄宋儒之書乃購六經性理蒙存諸書以課光

地講誦數年充然有得斂衣冠謹坐起非程朱不敢言  
康熙丙午舉於鄉庚戌成進士殿試擬第一人以制策  
一字錯悞置第五試詔令第一選庶常時

詔諸翰林各獻所學元地進河洛圖說復拔第一壬子除  
編修癸丑同考會試以親老乞歸養不數月耿逆叛福  
州鄭氏踞泉州光地遁匿深山與叔日烜謀具密疏言  
逆必敗狀爲蠟丸遣僕夏澤閒道走京師因內閣學士  
富鴻基以奏



王師入閩詔護其家擢侍讀學士赴闕至三山丁外艱歸  
有白巾賊蔡寅聚衆萬餘人攻安溪光地設伏據險絕  
其糧道衆遂潰散戊午鄭氏復攻泉州諸縣皆不守南  
北道塞俾叔日焜走福州求援從兄光斗等由西道迎  
將軍喇公哈達之師於漳平同母弟光埏從弟光垠等  
由北道迎巡撫吳公興祚之師於仙遊光埏路與賊遇  
三戰皆捷遂奪白鴿嶺光斗導將軍自大深經湖頭援  
兵兩道俱進泉州圍遂解諸縣皆復以功陞學士服闋  
入朝

名問機務因言鄭氏可減狀薦施琅可用後琅果破鄭降  
之壬戌疏乞奉母還家居三年還朝授掌院學士充經  
筵日講官己巳改通政使是冬陞兵部侍郎甲戌視學  
畿甸以內艱解任守制丙子復起視學凡試命題皆爲  
講解書義勉以通經學古多士奮興補工部侍郎科試  
未竣改兵部侍郎兼右都御史巡撫直隸修軍政扞水  
患正己率物毫不容私癸未陞吏部尚書仍兼本任乙  
酉拜文淵閣大學士扶掖善類因事陳列其人不知也

貞素周易折中輯朱子全書修性理精義頒行于學宮年  
逾七十屢乞歸乙未上疏力懇休退許假二年歸一年  
有

旨趣還朝

賜第南城明年卒年七十有七時

聖祖駐蹕熱河遺疏至不勝震悼遣尚書徐元夢賚銀一千  
兩經理喪事給全祭葬

賜諡文貞取遺書進

覽遣行人護櫬歸雍正元年加贈太子太傅十年追祀賢

良祠光地少無聲色之好衣食裁取粗給經年不奏絲  
竹門館寂寥無有私謁在政府十餘年公誠懋著矢念  
不欺每面奏論人言事無一語參錯至於入贊機務出  
持廷議臨決大事宏功若寂卒之 國是歸一民庶恬

安其所以壽 國脉培士氣築太平之基者世莫得聞

焉辛未己丑兩主會試得人獨多每遇 當宁求才薦

引不避如衛旣齊陸隴其趙申喬徐元夢德格勒揚名  
時李紱蔡世遠魏廷珍王蘭生皆爲世名臣碩德自通

籍後與前輩老宿爲忘年交虛心請益問音學於顧次

武問歷算於楊文鼎皆畧盡其要手不傳抄  
丹鉛數過與門人講論不厭往復有一言之合卽改已  
說而從之嘗自言爲學初入館與德子諤徐善長相切  
劘學乃一變中歲得楊賓實張長史學又一變至晚歲  
學問又進論者謂元明以來依傍者拾皮毛超躐者迷  
宗派惟光地篤敬義之實學得誠明之正傳而羣經訂  
正於易尤精專且久其遺書宗程朱造詣邃密直抉其  
未發之蘊所著有周易通論觀象詩所洪範說中庸章  
段餘論大學古本說論孟劄記尚書春秋未成書榕村

文集語錄又編纂數十種子鍾倫鍾佐孫清機清植清

藻清馥清泰會孫宗文

安溪志蔡各名家序記傳

○李光坡字耜卿號茂夫安溪人光地弟五歲與伯仲叔

兄俱陷賊壘脫難後受學家庭宗尚宋儒及鄉先正蒙

引存疑諸書弱冠爲諸生食餼矩度端重喜讀秦漢以

上書乃次第講治十三經昌黎全集濂洛關閩之書旁

及子史質不甚敏以勤苦致熟壯歲專意三禮積四十

年融會漢唐註疏詮成三禮解先後成書中年棄科舉

業授徒講學

一以明白易曉爲教康熙丙戌入都與伯

兄講貫尤篤著性論三書反覆辨論於理氣先後動靜  
以訂近代名儒講論之差及歸光地貽以詩曰後生茂  
起須家法我老棲遲望子傳蓋念繼述其學惓惓所屬  
無有過于光坡者光地嘗論東吳顧寧人與光坡皆數  
十年用心經學精勤不輟卓然可以自通於後三十年  
來罕見其人

聖祖嘗詢學古通經之士光地歷舉李顥梅文鼎等及光坡  
對他日詢及復稱道之

御書道通月窟天根裏人在清泉白石閒對聯以賜雍正

元年舉孝廉有司以光坡應已寢疾矣光坡性至孝父  
 病篤禱天焚香于掌爛不自知母老多病日侍寢房朔  
 望祈天益壽親喪十旬止飲勺水終身哀慕卒年七十

三所著有臯軒文集三禮述註子鍾份

安溪志  
 參家傳

○陳遷鶴字聲士號介石安溪人徙居郡城洪圖子幼而  
 穎悟八歲時嘗隨父臨流曰逝者如斯夫父大奇之甫  
 成童攜上公車同鄉有前輩賞其風格手韓文一編授  
 之自是卓然有志學古不逐時藝俯仰由漳州籍康熙

漢中補科舉人年五十康熙乙丑會試第三是科題目



聖祖欽定殿試成進士選庶吉士時同里相國李光地爲館師見其館課太極太虛論驚異曰吾鄉有是人耶因招爲邸鄰接席辨論每至夜分不輟其於經學不盡守宋儒之說上窮箋疏傳義而融以心得皆有論著尤精於易其書法嗜李北海骨力遒勁值南書房屢蒙

睿賞嘗書以進光地每謂人曰陳介石五十窮經經學甚明六十學書書法大進在乎志堅而力果耳何晚暮爲歎哉歷中允侍講侍讀至左庶子掌坊事年七十歸里

家居數載惟取京邸所著改訂矻矻不休踵門丐書者  
欣然應之年七十六卒著有論易十五卷尚書私記一  
卷毛詩國風釋一卷春秋紀疑三卷春樹堂文集二卷  
上峯堂文集二卷閒居咫聞十二篇韓江草詩一卷遷  
鶴行誼端厚家庭無閒言尤有德於鄉閭福州孝婦常  
氏未嫁而其夫陳生得罪長流義不改婚徑入門事老  
姑經七年遷鶴爲作傳募贖其夫歸總督興永朝訪求  
時弊時兵戈久息而泉中里長大當尚有存者請行釐  
革界外初復荒土多未墾有司按舊籍徵賦請就現耕

地丈量定稅密皆見施行鄉人利賴于萬象孫亮世曾

孫科捷並官翰林歷顯位  
安溪志參  
陳氏家傳

○李鍾倫字世得號菜園安溪人相國光地冢子性至孝

父母疾親視湯藥衣不解帶光地假歸初闢榕村書屋

繼結茅成雲洞鍾倫偕弟鍾佐天寵等羣肄業其中治

經史性理旁及子史既熟貫而必析其義為詩文不屑

效俗體光地回 朝復從其叔父光坡治三禮於周官

戴記尤盡心焉康熙癸酉舉於鄉計偕入京光地視學

歲輔任巡撫鍾倫往從承歡之暇益肆力經書壁閒書

戴記九容爲躬行之要居常持身謙退而志氣卓然於  
古人書務欲窮幽極渺常云聖賢重學力不重天資以  
天資不可恃也又云人於苦處不能尋味如何於樂處  
有得平生植志慕嚮前修一切嗜好泊然其處宗黨辦  
義利懷施濟禮舊郵孤振貧扶困尤多德誼可紀所著  
有周官纂訓數十卷三禮儀制歌訣一卷四書節記一  
卷卒年四十有四以子清馥貴 贈奉政大夫戶部四川

司郎中

安溪志叅  
李氏家傳

世綸字文賢號潯江晉江人琅仲子以廕知泰州

以職業時開河經理大臣至秦從官某強州民已受聘  
女爲妾世綸持之急立還諸民餘衆咸遵約束其後援  
剿兵過境聞其威名相戒斂戢康熙二十八年春

聖祖南巡世綸以廉能擢揚州知府揚州古繁華地世綸嚴  
禁四民之舍業蕩遊者俗尚一變值泰州飢被檄往賑  
力請興役修范公堤民藉力作以糊口全活甚衆調知  
江寧有上官私人居奇市價頓湧直陳其不便罷之女  
巫錢氏挾邪術傾動一時立杖斃之丁外艱歸士民籲  
畱不得人投一錢以贖卻之乃建亭於署左右名曰一

文亭服未闋

特簡蘇州知府辭不赴既除服卽家授淮徐道司河庫擢  
湖南布政使改安徽三筦帑藏不以毫髮自玷陞太僕  
寺卿以誑誤去官未兩月起順天府尹兼副都御史令  
行禁止畿輔肅然他省冤狀多投牒乞判陞左副都御  
史仍管府尹事未幾晉戶部侍郎督理錢法倉塲明察  
詳慎宿弊一清改兵部侍郎兼右都御史巡撫雲南未  
行改擢漕運總督劾貪弁除蠹役禁需索卻供具占風

候測水勢通阻得愆逗遛曹改次第畢舉陝西飢被

命賑濟設運載之法立贍給之方窮簷咸被澤無弗歡呼  
兩郡守虛耗劾之事連總督皆報罷歸日西人攀留道  
爲之軼至淮值河決晨夕相度以勞瘁卒於官年六十  
四

賜全葬祭世綸性警敏勤於莅事聽斷訟獄摘發如神他  
郡邑有疑案不決者輒移鞫之自州牧游歷大吏清白  
自持終始一節江泰淮楊並祀焉著有南堂集八卷奏

疏詞賦詩鈔若干卷

近道齋文集  
泰江南通志

○黃志璋字眉仲號璞園晉江人徽孕子爲諸生以廕入

監父喪歸值海寇避居安溪高會山寇平謁選授麻陽  
知縣甫至省隨制府軍前芻芻糗糧殫心調劑馬騰士  
飽一載始獲履麻陽任招徠安集撫摩噢咻瘡痍頓起  
楚經殘蹂後徭役苦不均糧寡丁稀者遇直年非傾家  
則逃竄豪強奸猾夤緣私自封殖志璋請均之太守固  
執阻撓與觸忤者五載及守故賦乃得平又因邑民構  
訟獲戾制府王王有幹僕過縣索饋餉擅笞吏志璋械  
之自是上官差使過麻者悉斂迹遷廣西全州知州



海濱火四面土司以直誠撫之不易民而化一日感恩  
土猺闕然出寇將至州界志璋度兵單不足禦敵端服  
坐堂上呼吏卒曰守土之義與爲存亡城若弗支以身  
殉之敢圖苟免哉已而寇爽期援兵亦至乃免邊圉將  
驕冒餉習爲固然因監放直劾營弁虛扣詞連督提遂  
作曉音一卷陳弊政十端掛冠以去越明年廣西巡撫  
彭鵬察民情特疏薦授正定知府精敏治事五州二十  
七縣訟獄衰息革陋規年五萬餘金有州牧趙某獻玉  
器數事實光陸離麾去之卽織緇食物亦屏不受越年

聖祖仁皇帝幸五臺志璋伏謁詢及耿鄭倡逆羣受僞職何

由獨免以避寇高會山三載對調鞏昌知府未至陞兆

岷隴右道治邊陲監市茶馬勒禁薄易持之以公番人

感德致劔與馬屏弗受監捐豆麥剷除常規倉儲充裕

年六十餘致政歸置義田修宗譜有功宗族壽八十五

卒著有璞園集遜齋集嘉言錄行世

節黃氏家乘

○蔡仕舛字詒霞號藐邨晉江人太僕卿鵬霄孫韜榆令

仕岳胞弟少聰穎好學持身嚴正年二十三登康熙癸

酉賢書授魚臺知縣邑故洿下多河患至則力為疏濬

野無漫流東省素苦蝗捕撲之役民困供億仕刑謂捕  
蝗救民寧以累民損車徒挈榼而往自後不蝗卽蝗不  
爲災邑賦歲二萬餘民多逋負爲每兩裁減火耗五分  
民便之癸巳分校文武闈取士得人興學校培人才文  
風以振治縣八年巨盜就法逸囚自至行取試刑部廣  
西司主事提牢三月囚糧必親嘗遍給獄無瘦死補戶  
部河南司主事兼理四川司陞監察御史歷巡三城一  
切米廠食儀番役門禮槩革除

世宗憲皇帝登極擢工科掌印給事中甲辰典湖北鄉試佳

士林立輿論翕然向例旗匾銀給主司路費仕卹獨屏  
卻之復以原銜出督浙江糧儲道奏減漕規舊例年二  
千九百餘兩請寬追扣漕丁積年侵支工食署按察司  
奏免監候死囚逐年解審承辦銅斤事竣以節省銀四  
千六百餘兩解送藩庫署布政司覈贏餘米三千七百  
石歸公隨以都察院僉都御史任浙江觀風整俗使旋  
署浙江巡撫出耗米充辦科場增築海塘通省利賴嗣  
以失察書吏解組歸仕卹天性孝友俸餘分惠族戚未  
嘗自私有姊爲未亡人終身事之如母又好獎借單寒

接引後進鄉評重之歸時年六十一藏書萬卷時手一

編越六年卒著有奏疏及藐邨詩集若干卷節彭大司寇撰誌

○李鍾僑字世邠號抑亭安溪人天性孝友仁恕涵養醇

厚溫然如春幼嗜學善屬文康熙壬午舉人壬辰進士

授編修杜門數十年恬澹自勵督學江右江右治故尚

嚴急諸生往往觸於文網鍾僑至惟誘進人士務經學

有速訟者必令覆聽需其罪實而後禡之士論翕然高

安朱相國軾每曰百年中無或並也按察使李蘭以咨

革生員付審移文鍾僑難之遂上密章即用姑息二字

爲彈劾章內亦具列其廉明後改補國子監丞公暇修  
輯舊學所著有論孟講蒙詩經測義尚書典謨周禮天  
官易說等書鍾僑內行純篤往在江西以所得俸餘立  
廟祀祖先宗人有以居室售者諸子與訂鍾僑聞之曰  
吾不忍也還其券而不徵其直其爲學潛心理解契悟  
精微臨川李穆堂爲撰墓表子清載清江清芳

安溪志  
泰家傳

○李天寵字世來號鑑塘安溪人爲人礪節操遂於經學

康熙戊子舉人乙未進士選庶常授編修在史館二十

年落落無所合與弟鍾僑以氣節學問相高蕭然一室

對床風雨不爲世人標榜聲華計鍾僑歿於京護其喪以歸歸則以著書講道爲業疏註六經數十本碩德耆舊爲鄉祭酒子弟以德化服之杜門卻掃屢困於薪米一不以綴意守令有慕其風者終不一見嘗從其父鼎

徵令嘉魚多所贊助焉子清時乾隆壬戌進士由翰林

歷官府道

安溪志  
參家傳

○李清植字立侯號穆亭安溪人光地孫幼失怙恃侍其祖每事先意以承壬辰回籍補弟子員癸巳入京光地奉修周易折中性理精義

聖祖諭舉所知分纂以清植同諸賢應詔康熙丁酉舉人雍

正甲辰進士選庶吉士

授編修己酉典試江南事竣復

命嘉其端方正直逾年補中允尋遷侍講出督浙江學

政下車首以經術課士崇實黜華啓牖學者悉從有宋

諸儒梯航六經汲汲如不及以保舉夫人降級歸乙卯

冬首召文定楊名時於滇南而清植與徐用錫同時並

命到京補翰林院侍讀充日講起居注出典浙江鄉試事

竣疾作乞歸家居數年壬戌至京分纂儀禮補原官旋

陞右庶子



御試一等擢詹事府少詹充三禮館副總裁陞內閣學士  
兼禮部侍郎充武英殿總裁兼辦經史館事甲子陞  
禮部左侍郎以病甚具摺辭不允未幾卒臨歿遺疏畧  
曰惟願我

皇上益崇惇大之治彌塵如傷之懷法令已極周詳毋以  
細碎科條啓繁苛之漸臣下但取忠實毋以承順趨走  
開緣飾之風閭閻之民力日瘁飭外吏惟重撫循而毋  
滋騷擾草野之利源漸竭戒計臣宜重大體而毋盡錙  
銖其言不及私忠愛之心惓惓與光地如出一轍云

○陳大玠字元臣號筍湄晚更損微晉江筍江人雍正甲辰以五經聯捷進士授臨漳令邑苦河息濬白陽萬公普濟福惠四渠俾積水入河壇廟橋梁隄岸道路漸次修治課農桑興學校濬鹽刑錢諸務加意恤民秩滿陞內府中書科舍人土民懇留督臣具題下部議未覆撫臣送部引見摺奏漳邑漕米甲豫省而離水次遠輸運維艱蒙

恩豁減四千三百五十五石永爲例漳人益德之越二年

御試一等記名以御史用旋擢禮部儀制司主事司中文

稿多出其手直省舉貢生監請咨革開復者或准或駁  
俱按情據理寃誣者雪之議加永春州學額入泮十八  
名武生十五名辛酉命典試粵東未出京隨擢浙江  
道御史至粵虛公遴選所取士皆得人陞吏科給事中  
在臺垣前後二年餘所進經史解九篇皆洞徹古今發  
南書房選刻其奏疏彈劾封駁悉中體要如請督撫藩  
臬宜久任請揀選京員考試御史請翰林等官罰俸分  
三年勻扣請禮部司員非科甲者改補別部請湖北巡  
撫另簡賢員不必復用許容皆荷

特旨允行其發部及九卿議覆照行者則請停文武互試  
請積貯出借免息請平糶不得派買請臺灣米穀接濟  
漳泉官弁不得藉盤驗需索請繳銷舊印截角請漕米  
不應改折請革代考蒲州同知張永煦請江浙米穀視  
豐凶通阻不可槩禁出港請在京書吏飭改原籍也其  
議覆不行者則加五經中額春秋仍出單合題改教知  
縣免引 見博學鴻詞科勒石題名國子監也泉州故  
無會館倡首捐資并致書鄉之外宦者劇千餘金購孫

公園屋爲公車稅駕地又於晉江舊館買曠地一片以

備添蓋陞太常寺少卿丁內艱臨漳士民劇錢備祭幛  
至京拜奠行至東昌漳里老越四百里拜送焉抵家喪  
葬既畢修族譜營家廟置祀田建牌坊於戚友多所分  
潤集耆紳於後樂園爲洛社會郡邑長禮請賓筵年七  
十六卒所著有荀湄內篇四書文初稿近稿續稿宰鄴  
治譜恭和詩臺垣奏章進 呈經史講義文集詩集子

金涵通判金駿知縣金鳳國子監典籍金宣乾隆庚午

舉人 採莊滋  
圃撰誌

○陳高翔字子搏號巽園晉江人康熙甲午舉人雍正丁

未進士授工部營繕司主事管製造庫督理五城街道  
精勤敏練歷署上考轉兵部職方司主事兼管車駕司  
書吏有舞弊者向多因循獨執法杖之一時肅然大司  
馬西林鄂公奉新甘公廉其才京察列第一旋保舉御  
史授山東道御史疏陳吏刑二部應更革事宜其一謂  
聖主以孝治天下停外官在任守制之例而丁憂服闋之  
員赴部銓補守候數年非所以教孝請將月選補班於  
原班次再增一班俾免壅滯遂著爲令又因兩廣總督  
奏請發帑六萬營運辦公疏陳義利之關侃侃數千言

他如請除朋銀解部以紓民力請武科外場未優策論  
傑出者酌撥中額以收人材請飭禁囤積須嚴查奸戶  
不得將耕獲稍餘之家需索擾害請恤旗丁勿任衛干  
河弁肆行網打皆有闕政治大著直聲外轉江西驛鹽  
道卻例金平鹽價商民均便晉山西按察使時有兩大  
獄

欽差少宰楊嗣璟往按高翔將案情窺曲疊疊力陳奏當  
平允調江蘇按察使吳地繁劇甲直省清理庶獄不辭  
勞瘁未幾調廣東海疆多重案益矢精勤有好匪自首

議者欲築置重辟高翔請誅其魁而脅從者量與未減  
言之至於涕泣署撫軍策公歎爲仁人君子云以積勞  
得病歸建祠宇置祀田董修晉邑 文廟暇時或拈題

作制義與同志相質爲樂年七十五卒

節家傳